


EPYO Y'ENOWA

 Muluku ootthuneya, Muluku muulupale ni a ikuru, Ole opanke itthu sothene n'uwerya wa Eroho Awe, ni omurunhe Yesu Kristu, Mwana Awe mmose-ene, Yowo onikhwenle vootthuna wene hiyo anatampi, Naxariya mwaha w'alipa-ootakhala, wira atthikele onaataaniha hiyo opatthana nno wooreerexa hiyo nrinaahu tho ni Muluku, ntoko hiyo siniixuttihiw'ahu mwa Masu ooreerihiwa, wira hiyo naahikhalana opatthana ni Yowo ohinatthi opattuxiwa olumwenku: "Okathi ittheneri s'oxaka siipaaya vamosa, ni aana a Muluku yaatthap'aya mwaha w'otteeliwa murima, khalai ohinatthi opattuxiwa olumwenku." Ninsuwela sai hiyo wira owo khawaari okathi mmosaru Mwapwittipwitthi iiviwaawe; wira okathi Muluku, mwa muupuwelo Awe muulupale, aahinoona hiyo nikhuwelaka ni nitthapaka muhina wo woopoliwa wahu mwa Yesu?

² Ni, ohiy'ula, hiyo nrina paahi ethoonyero wa ovuwa iwe wuulupale wa oMuluku yowo onrowa wooniheriwa mwa Orwa Wawe wa neenli. Iretta sothene ni mixankiho sinrowa okhwelihiwa. Nto ninrowa okhalana erutthu ntoko erutthu Awe yoovuwa yowo Mwaneene, maana hiyo ninrowa omoona ntoko Owo siry'awe. Nno ntoko sinweh'ahu matata ahu anyaalaka, maihi ahu akhalaka oottweelela, ni makhata akhurupuwaka, nri oosuwela wira hiyo ninnookhwa ni nihaattamela ethhaya yeyo miru sahu suuramenly'aya vano, ni vaavo hiyo okhumme ahuvo. Masi, Pwiya Muluku, vekeekhaixa ntoko Nyuwo siry'anyu Muluku, Nyuwo moomulapa natiri wira hiyo naamuhihimuxiwa tho mahiku ookiserya, ni hiyo ninnaamini yeyo.

³ Voottittimiha hiyo nri ni wamini wahu ohiy'ula Ohoolo Wanyu, nrwaaka n'uminyala okhala wira Yesu ooniruma wira yeyo. Kahi vasulu v'etthu yooreera hiyo niiraly'ahu, maana hiyo khaninre hat'etthu yooloka; masi hiyo nnoorwa vowiyeviha, nihimyaka wira hiyo nrina muhakhu ula mwaha wa mahala Awe yawo nikaweliw'ahu. Tivo, hiyo nnoorwa nivekaka wira Nyuwo munreerihe ohiy'ula mwa enamuna y'oruuha Masu. Maana yolempwa, wira, "Mutthu khanikhala mukumi ni yolya paahi, masi ni Masu othene anikhuma mwaano mwa Muluku." Nto muhiye mwaano mwa Muluku olavule ohiy'ula. Muhiye moolumo akhume, ni wira Awo arowe muhina mowiixa mmurimani mwahu hiyo, alipa-oowiriyana, ni nikhale oosarihiwa ni Eroho Anyu ni Mukhalelo Anyu. Maana hiyo ninvekela mwa Nsina na Yesu. Amen.

⁴ O—olelo ni nsana, nsana ohiyu, kiireke, ni olelo, hiyo ninlavula mwaha, yoopacerya, wira nihoolele, *Mwaha Wa Xen'i Ehikhalenly'ahu Muromolelo*. Ni hiyo nookhaliha woolipa

vanci-ene, mwaha wa xeni ehikhaleleny'ahu muromolelo, ni mwaha wa xeni ohinaamin'ahu miromolelo. Okhala wira, hiyo ninniphwanya mBibiliani, wira miromolelo khasinatoko otthokhiwa ni Muluku; iyo sitthokhiwe ni xetwani; ni nihooniherya ni Bibilia. Ni moota, mwa miromolelo, eniruh'aya ovonya. Vano hiyo nnihimya ela wira nilakiherye ni niruue etapernakulu ila mopatthanani eriyari ya Masu a Muluku. Wira, miroromelo sahu khasilimpe n'ile muromolelo onihimya'aya, wala ele mutthu ti mutthu onihimya'awe; silimpe n'ile Apwiya Muluku ahimaly'aya. Ni eyo t'inamuna emosa tu enwerya'ahu ottharuxiwa oratta-ene.

⁵ Ni vaasiis'ula, kaahikhalana maartiku athanu oovirikana, kookupali, anikhuma eriyari ya muromolelo, yawo vekeekhai ahinlavuliwa mBibiliani, ikereja Protestante sinuuramel'aya, ni wiixuttiha ntoko mwiixuttiho: etthu emosaru yeyo maama namuttompe, ekereja Katolika enlaley'aya, n'ukhuma ekelaka ekereja Protestante. Ni hiyo nnuuramela etthu yeyo eri yoovirikana nipuro pi nipuro mwa Masu a Muluku.

⁶ Ekereja yoopacerya ya muromolelo, naavyal'ahu oxekuwa ola mwa wahala aaxitithi ooNicea, a ekereja y'oNicea. Okhwa wa arummwa, vaavo anirw'aya axitithi ooNicea, ni awo yaahirowa ohoolo iyakha sinci-ene. Iyakha imiya tthaaru ni miloko miili ni thanu, vookiserya khurwa o—oNicea, oFransa, weiwo awo yaarin'aya mu—muthukumano muulupale w'oNicea. Nto memmo awo khutthokiha makano ala ekereja Katolika erin'aya vano, ni yawo tho avahiwe maProtestante.

⁷ Ni ntoko sihimaly'aka mmwi—mmwiixuttihoni vaasiis'ula, "Khula mmosa wa okathi ule wa ikereja, oronwe mpakha o—okathi ule wa ekereja y'oTesalonika, iyakha ekonto emosa ni imiya thanu w'okathi w'epiphi, khawaakhanle hata okathi mmosa Owo aatonko awe ohimya wira, 'Nyuwu nlelo mookhalana Nsina Naka.'"

⁸ Nto epantte ela ekina, awo khayaari tho mwa Kristu, awo yaakhumenle ota mwa nsina na muromolelo, "Katolika, Lutero, Wesley, Patista, Prespiteriyano, Pentekosite," sirowaka.

⁹ Masi okathi vakhani ohinatthi omala okathi, Owo khwira, "Miyo kinihela ohoolo wanyu mukhora woohuliwa." Munnona? Nto owo p'ukathi hiyo onikhupaly'ahu wira t'uryaahu naanaano va, okathi wa mukhora woohuliwa, eriyari y'okhuma wookiserya wa ekereja ya Lawotiseya.

¹⁰ Ni vekeekhai iyakha imiya tthaaru ni miloko miili ni thanu mpakha muthukumano w'oLawotiseya. Nto mmo awo khukhaliha inamuna iya ntoko omiserya, oyeeherya, ni opatiiso wowootha, eroho yowarya vowootha, itthu iya sikina sothene. Awo khukhaliha.

¹¹ Nto vo okathi Lutero, aryeene namukuttho, khikhuma ekereja Katolika, aahiruua itthu iya ni yeyo. Nto mmo

khikhuma-mo Zwingli, mwa Zwingli khikhuma Calvino, mwa Calvino khikhuma Wesley, oh, erowaka siiso. Nto awo anikhala aruuhaka makano awo. Nto enweryaneya sai Muluku weettiha Ekereja Awe, iyo sittharaka iphiro seiyo Owo hata ohinatoko awe oruuha wira awo yeettihiweke-mo?

¹² Nto muupuwele, mwa Wisuupulula 17, hiyo ninnimuphwanya “muthiyana.” Vano moolumo ala t’owiiweya. Awo alempwe mBibiliani, vano miyo kinoona wira pooti ohimya. Anihimya wira muthiyan’ola aari “namuttompe.” Enihimya wira owo aari muthiyana mmosa oohifai; wira yaatthuneya wira owo atheliwe ni mulopwana mmosa, nave aaniraruwa n’ulumwenku. Ni owo aahikhalana. . . Owo aari “MAI A ANAMARARUWA,” tivo owo aahikhalana aana. Nto hiyo nookweretha eyo mwa mukhalelo aya, ekhalaka mwa. . . Ni vo, mmansaka, koonaka mwa Solempwa, koonaka miixuttiho sawe ni itthu sothene, miyo kinnaamini wira Apwiya ahenle awo oratta-ene muliinyani, wira khivanweryaneya eyo okhala etthu ekina woohikhala ekereja Katolika. Ti enamuna emosa tu enweryaney’aya okhala. Nto eyo eyanre exeni? Ikereja Protestante. Vekeekhai, eyo yooyara.

¹³ Ni eyo yaahikhalana mmatatani mwaya muhasa wa evinyu ya mooraruwani mwawe, nto owo aavaha mamwene a mulaponi. Ni owo aari mulipa-ooruma mulaponi mothene, olavula wa murohoni. Nto eyo vekeekhai ti yeyo. Khekhanle ekina. . .

¹⁴ Nkawehani, nrowe, naamuwerya othhikela mwa Daniyeli ni okuxa elatarato. Nkawehani elatarato: muru wa eweero, omwene w’oPapilonia; epronse. . . ahiso eparatha, Media ni Persia; eparatha, Alexantere Muulupale, ni akina, omwene w’Akereku; nto omwene w’oRoma, Roma a epantte Onikhuma nsuwa ni Onikela nsuwa, inawo piili.

¹⁵ Nto nwehe omwene ola muloko, yowo onoorwa vekeekhai ni manyaka ale muloko hiyo naalavul’ahu vaasiis’ula, khula mmosa wa omwene ole muloko yaari wira avenye, yaahikhala eyuuma ni oloko wootakanxana. Ni eyuum’ele yaakhuma mmettoni, yeeyo aari Roma. Ni nookhala nlepa na Romanisimu nootakanxana ni khula elapo eri vathi V’erimu, mwa ekereja Katolika. Eyo vekeekhai ekhweeli. Ni iyo khasinrowa otakanxana, hata nipuro.

¹⁶ Nto iyo saamurowa othelanasana, eriyari ya emosa ni ekhwaya. Bibilia ohimye wira yaamurowa wira siiso. Nto nkaaweheni olelo. Mmiravo anyu oneetta ni mwali muKatolika; okathi anrow’aya othelanasana, awo ahaana wiiwanana waalela an’aya eKatolika; moone, voohihiyana. Moone, eri wira emalihe ikuru sa mukina.

¹⁷ Masi exeni iyo? Bibilia onihimya wira etthu yothene namuttompe. Vano munrowa wira exeni? Ti yeyo. Ni moota itampi s’atthu sinrow’aya othotoliwa. . . Hiyo nootthikela mwa Otumererya, khooniha wira mwana ooraruiwa,

mwana a mukulukuthina, khivaaweryaneya nnakhala okela mmuthukumanoni mw'atthu a Apwiya mpakha maloko muloko ni maxexe. Eyo yaari vathi v'ekano. Ni Kristu aarwenle winnuwiha ikano. Etempe sai vano?

¹⁸ Nto exeni eniiraneya n'ala, mulattu xeni n'axiruusi ala mphironi olelo, axithiyana ala animulya sikaro, ni anaawara akaputtula, axiruusi oometthiwa maihi, ni sikina? Mulattu aya xeni ni yeyo? Okhala wira amey'aya yiiraka siiso. Iwo othotoliwa, sootakhala, nloko nimosa mpakha nikina. Ti yeyo ery'aya. Nto hiyo nrina exeni? Hiyo noophiyerya nipuro, muthukumano wa hat'etthu ehikhanle etampi yootakhala.

¹⁹ Tivo Muluku omuvenxaly'awe Russia, iwe, ni musika w'atomu wira omukumihe-vo, ntoko saary'aya ohininatthi osarya maasi a mutaseke, okathi Owo aavenxaly'awe meeku. Vekeekhai, Owo ohaana. Ni Bibilia onihimya siiso. Russia, elapo yoohimwaamini Muluku ntoko awo siry'aya, oohimwaamini Muluku, vekeekhai onivara muteko voomalela mmatatani mwa Muluku Oowerya sothene. Vekeekhai ntoko Mwene Nabukodonosori aary'awe wira amuhonone Isarayeli okhala wira awo yaahihya weetta ni Muluku, Russia onoovenya naanaanoru wira "anle ikuhu mwaha wa masantu," a ekereja Katolika, a ephome eyo eyeehaly'aya ya masantu. Bibilia ohimye siiso. Onrowa okuxa etthu yothene.

²⁰ Vano nwehe va, vaari wira amey'awe yaari mwaarusi a nikhuru nowiipa, ni apiipi awe, ni amey'awe yaari naweettasa pure, owo t'ani olelo? Namarula ikuwo rock-and-roll. Aan'awe anrowa okhala exeni?

Nto nyuwo munira, "Muluku onniira eyo?" Ayo, mulopwana.

²¹ Muluku onnithotola sootakhala sa aana, nloko, mpakha maloko muloko ni maxexe. Nto vaari wira Kristu aarwenle wunnuwiha yeyo, hiyo naamwiira, "Maloko emiya, wala maloko imiya thanu." Vano, Owo ohimye wira, "Ale a khalai, nyuwo moowiiwa awo wira, ale a okathi wa khalai, 'Nyuwo muhiive.' Miyo kiniira wira, 'Nyuwo, ole oninviruwela munna awe, vahi nthowa, oomala omwiiva.' Nyuwo moowiiwa wira, ale a khalai, 'Muhiraruwe.' Masi Miyo kinihimya wira ole onimuweha muthiyana wira amuwereihe murima, oomala oraruwana." Owo opanke eyo. . . Exeni *wunnuwiha*? "Okhala yuulupalexa imara sinci-ene." Nto vaari wira vathi va ikano yaakhala maloko muloko ni maxexe, okathi xeni onrow'aya okuxa etthu emosaru olelo?

²² Ni aximiravo, axilopwana a iyakha s'eriyari, ni alopwana oothela kxanimuttittimiha-tho natiri aya w'othelana. Vano, awo anaakuxa athiyana paahi n'ukhala ni yawo nipuro pi nipuro, vekeekhai ntoko alapwa pure. Mwalapa ookhalana nttittimiho woolokaxa ni olakeya shirin'aya atthu akina. Ni miyo koosuwela wira eyo ti yootepa vancipale, masi ekeekhaii.

23 Mwaha wa xeni? Ni ikereja sinoorowa ohoodo n'uhihimya hat'etthu mwaha wa yeyo. Mwaha wa xeni? Awo aniira ntoko mai aya siniiraawe. Ikereja sinrithi yeyo. Okhala wira, ekereja ni ekereja Protestante ila ekhumme mukereja Katolika, itampi sa ekereja Katolika sinthotoliwa mwa maProtestante. Vekeekhai, ti yeyo, vano mwaapu khoniwerya wiihana epirikha "oottakatta." Eyo vekeekhai ekhweelii.

24 Vano hiyo ninnoona wira, ni mwa Solempwa, hiyo ninoona wira... Ni miyo nkinaphwanye yolempwa va ohiy'ula. Miyo khwira, "Mukoonihe nipuro nimosa vaavo Muluku otonko awe othokoikiha muromolelo. Mukoonihe nipuro nimosa vaavo Muluku otonko awe omukhaliha muthiyana mulaleyi. Mukoonihe nipuro nimosa vaavo Muluku otonko awe oniruma omiserya. Mukoonihe nipuro nimosa vaavo Muluku otonko awe oniruma oyeeherya. Mukoonihe nipuro nimosa vaavo Muluku otonko awe okhalana mutthu mmosa opatisiwe ni nsina 'n'Athiti, Mwana, Eroho Yowarya.' Muphwanye itthu iyo." Nave nlelo hiyo ninniira voohihyererya. Vekeekhai eyo ekereja paahi.

25 Vano, miyo khwira, "Mwa enamuna anyu yo wuupuwela hiyo khivaatthuneya okhala aPatista, okhala wira hiyo ninnaamini wira awo yaari oopatisiwa ni Nsina n'Apwiyi Yesu Kristu. Khokhanle hata mmosa otonko, mBibiliyani, opatisiwa enamuna ekina. Nyuwo mukoonihe nipuro nimosa vaavo mutthu mmosa aapatisiw'awe ni nsina 'n'Atithi, Mwana, Eroho Yowarya,' miyo kinoovenxa matata aka kiire wira ki profeta oowootha."

26 "Nto vaari wira Bibilia onihimya wira muhaana 'opatisiwa ni Nsina na Yesu Kristu,' eyo enihimya wira nyuwo muhaana wira siiso. Paulo aahaaruma opatisiwa. Hata wira yaapatisiwe moota xeni, awo yaahaana orwa, opatisiwa tho. Awo yaapatisiwe ni mulopwana yole aamupatinse Yesu Kristu; Yohani Mpatisa. Owo aahimye wira, 'Ele khenivara tho etthu. Nyuwo muhaana orwa, mupatisiwe tho.' Nto awo yaahaana wira eyo ahinatthi waakhela Eroho Yowarya. Owo waari mutthokiheryo wa Muluku."

27 Miyo poti orowaxa vathi ovikana yeyo, ohiy'ula. Mwaha wa xeni? Yesu onnisuka Masu Awe. Nyuwo munnaamini yeyo? Vano, ookhuveela othene anyu mwaari vaava vaasiis'ula, masi miyo kintthuna kooniherye vakhani-tho mwa yeyo.

28 Mwaha wa xeni Paulo aarow'awe waaru... oruma yeyo emanleene wiiriwa? Paulo iirale, "Hata wira Nlaikha nnikhuma Wirimu naamoowa n'ulaleya etthu ekina tho, akhale ootakhaliwa."

29 Vano nyuwo munira, "Hiyo nookhalana Warya musya mwa yeyo." Nnari, khamurina. Ti yeyo xetwani aarulyan'awe wa Hawa, Warya mmosa musya. Khivantthuneya Warya musya. Entthuneya nyuwo weetta moWaryani mwemmo Muluku ohenly'awe va, ti yeyo tu.

30 Vano nwehe ela, vookhweyaxa paahi. Okathi awo aruuly'aya akhumaka Omwako w'Orukunuwa, Yesu khwahimeerya, awiixutti Awe, "Atthu aniira wira Miyo Mwana a mutthu ki pani?"

"Mmosa khwira Nyuwo mwa 'Moise, wala Eliya, mmosa wa maprofeta."

Owo khwira, "Nyuwo muniira ki pani?"

31 Owo khwira, Pedru khwira, "Nyuwo mwa Kristu, Mwana a Muluku mukumi."

32 Owo khwira, "Ooreeriwa ti nyuwo, Simoni, mwana a Yona; maana kahi erutthu n'iphome ewuupululenleni ila." Moone, eyo khenikhuma museminariu. Eyo khenirwa muhina mwa miromolelo. "Erutthu n'iphome khewuupululenleni ila. Nyuwo khamunatoko wiixutta eyo muxikola mwa teologia. Masi Atithi Aka, yawo ari Wirimu, t'awuupululenleni ila. Ni vasulu vamwala yola Miyo kinooteka Ekereja Aka; nto mikhora sa mokhwani khasinwerya oxintta," muupululo wa murohoni wa Ele Owo okhanly'awe.

33 Nkawehani, "Ni Miyo kinihimya wira nyuwo mwa Pedru. Ni Miyo kinimoovahani ihulelo sa mOmweneni. Nto khula etthu entthukw'anyu vathi va, Miyo kinootthuka Wirimu; khula etthu entaphul'anyu vathi va, Miyo kinootaphula Wirimu." Vano, Owo aahaana osuka Masu Awe ahiso Owo khaari Muluku. Vano, okathi Owo vairaly'awe yeyo, mahiku vakhani ohoolo waya, Owo aahikhomeliwa, khuhihimuwa, khuwela Wirimu, nto Pedru khutthukula Ehapari yooreera Nihiku na Pentekosite. Owo aahiira yeyo? Owo, vekeekhai, owo aahiira. Vano nwehe, okathi owo aarow'awe . . .

34 Awo othene yaamwaanymulasa, okhala wira awo yaari oosareya Eroho. Awo yiihaniwa "owiivalaanya, masantu oophirikeya," wala nsina ntoko nenno. Nto awo yaanaatheya, ni wira, "Ala asaren'ye eviinyu ya naanaano."

35 Nto Pedru avenyaka eriyari aya, khwincererya nsu nawe, owo khwira, "Alopwana ni axinna, nwiriyane nsu naka. Nwiriyaane moolumo aka ni mukiiwe. Ala khahapalasiwe ntoko sinaanyihery'ahu awo okhala; ela ewoora ya neeraru y'othana paahi. Masi ila t'ile yaahimmwe ni profeta Yoweli, 'Nto enimwiiraneya mahiku ookiserya, Miyo kinoomwaraxa Eroho Aka,' ni etthu Owo aarow'awe wira mw'ana Awe alopwana, n'athiyana, ni arumeyi Awe axithiyana, ni akina, nihiku nlo."

36 Nto okathi awo apacenryaaya wiiwa yela, awo yaahiriipiwa murim'aya. Maana, awo yaroomwiiwa mulopwana mmosa ahaamusuwela ABC awe, nnakhala vo awo yaahaana onwiriyaana, khusuwela wira owo aahikhalana Etthu mwa yowo, emuvihihaka, Eroho Yowarya. Ommaaliha? Vano, yaarowa okhala ntoko weererya ohela mooro, vasulu v'empa yowuuma,

nihiku n'ettheke. Khivaaweryaneya. Owo aasaren'ye Eroho Yowarya. Nto owo iinre exeni vano?

37 Awo khwira, "Ahe, alopwana n'axinna, niireke exeni wira noopowe?"

38 Vano pasoopa, Pedru, nyuwo mookhalana ihulelo sa mOmweneni. Munnona?

39 Vano, okathi Yesu ohihimuwaly'awe nihiku na neeraru, Owo khaarina ihulelo sa Omwene wa Wirimu. Nyuwo mwaanisuwela yeyo? Owo ohimnye wira, "Miyo kookhalana ihulelo sa mokhwani ni omooroni," masi kahi sa mOmweneni, okhala wira iyo aahivahiwa Pedru.

40 Vano Owo khwira, "Pedru, etthu p'itthu entthukul'anyu vathi va, Miyo kinootthukula Wirimu. Etthu entthuk'anyu vathi va, Miyo kinootthuka Wirimu."

41 Vano va owo ori ni ihulelo, wira ahulele etthu ila yooreeriheliwa olumwenku. Nto va owo orina ihulelo mmatatani mw'awe. Nto awo anookoha, "Niireke exeni wira noopowe?" Vano, hata wira murummwa aahimnye wira yiiriwe exeni, Muluku ohaana osuwela Wirimu, vaari wira Owo oomuvaha ehakhi iyo.

42 Vano Pedru khwira, "Murukunuxe murima, khula mmosa a nyuwo, mupatisiwe ni Nsina na Yesu Kristu wira muleveleliwe itampi sanyu, nto munimwaakhela yoovaha ya Eroho Yowarya." Eyo ekeekhai? Nto tivo ihulelo sirukununw'aya Wirimu wa nsina nikina, enamuna p'inamuna ekina, etthu ekina—hata enamuna ekina. Eyo erukununwe vathi, ni erukununwe Wirimu, weso Yesu khasunke Masu Awe wa Pedru. Ni khula nipuro mBibiliani awo yaapatisiw'aya, numala yeyo, yaapatisiwe ni Nsina na Yesu Kristu. Ni ale yaapatisiwe ehinatthi yeyo, yaahaana orwa n'upatisiwa emara ekina, ni Nsina na Yesu Kristu, wira yaakhele Eroho Yowarya. Eyo t'eri yekeekhai. Eyo nlelo enikhala emosaru.

43 Vano, vaari wira hiyo nniixuttiha opatiiso ni nsina "n'Atithi, Mwana, ni Eroho Yowarya," owo oprofeta wowootha. Vano miyo nkinthuna owiiniani murima, masi miyo kihaana ohimaxexa ela wira ekereja ela esuwele exeni. Hiyo kharri va ntoko nikhuru n'alolo oohisoma; hiyo ninnisuwela vatthu vary'ahu muhina mwa Masu a Muluku. Moone, hiyo ninnisuwela. Miyo kinnimutharamula mutthu ti mutthu wira akoonihe nipuro nimosa vaavo mutthu ti mutthu otonko awe opatisiwa ni nsina "n'Atithi, Mwana, Eroho Yowarya." Vano nyuwo munrowa wiiwelela oprofeta wowootha wala Ekeekhai? Mwaavavye Solempwa. Eyo ti yawinyu.

44 Mukoonihe vatthu mutthu mmosa mBibiliani, vaavo ekereja etonko aya okhalihwa muromolelo mbi—mBibiliani. Mukoonihe mBibiliani vatthu awo yatonko aya omukhalihwa muthiyana mulaleyi. Mukoonihe mBibiliani vatthu itthu iya sothene,

hiyo nnihimy'ahu, sitonko aya otthokihiwa mBibiliani. Iyo khasirimo mmo. Mukileele nipuro nimoso. Nyuwo murowe omuromoleloni. . .

⁴⁵ Vano, okathi aMetotista akhumelenly'aya, yaalaleerya oreerihiwa. Eyo ti yooreera. Masi, vairaly'aya yeyo, awo khupaka muromolelo, nto eyo khumaliha mwaha. Tivo Bibilia sihimaly'awe, "Nyuwo mookhalana nsina."

Nyuwo munira, "Miyo ka muKristu."

"Vano, muromolelo xeni muniir'anyu mpantta?"

⁴⁶ Nyuwo munira, "Metotista," vano, nyuwo mwa namararuwa weso. "Miyo ki Patista," namararuwa. "muPentekosite," nyuwo mwa namararuwa. Nyuwo munira mpantta wa ekereja yeyo.

⁴⁷ Nyuwo mwaahaana wira mpantta wa Kristu. Ohikhalana nakoso owiira, "Metotista," "Patista." Nyuwo mwaari muKristu, mwa muKristu mmurimani.

⁴⁸ Khula mmosa wa miromolelo iye sinniwerya waakumiherya aana, aana a Muluku, ti yeyo. Masi muupuwelakaru wira munoorowa Wirimu mwaha paahi w'okhala Metotista wala Patista, moovonya. Nto tivo hiyo nikhany'ahu ota w'ethu iyo.

Ahinwerelani aPatista woota?

⁴⁹ Miyo kaahimukoha mulopwana mmosa Metotista va, alepaka muteko awe w'osoma, owo olempe khalai. Owo khwira, "Ethu emosa hiyo enivirikanel'ahu ni nyuwo, nyuwo muneetta n'aPentekosite."

Miyo khwira, "T'ani akhanle 'hiyo'?"

"Hiyo, aMetotista."

⁵⁰ Miyo khwira, "Vano, miyo kinimooleelani etthu enrow'aka wira. Miyo kinimoorwa muttetthe anyu nto mwaahiye aMetotista akhaliherye."

"Oh," khwira, "vekeekhai, khivaaweryaneya hiyo wira yeyo."

⁵¹ Miyo khwira, "Vekeekhai ti yeyo miyo kuupuwenly'aka. Miyo kinikhala n'aPentekosite okhala wira aPentekosite annaamini. Ti yeyo. Awo annitakaniha ikuru wira akhaliherye. Awo t'ale aniphwana mureerelo aya."

⁵² Akavi amusomme artikulu ule murevisti *Life*, naanaanoxa, yaahimya mwaha wa ekereja Pentekosite? Eyo emosa wa sokhumelela suulupale okathi ula. Awo anikhhalana atthu anrukunuxa murima owaattaxa mwa eyakha emosa ovikana ikereja sikina sothene sitakanxi wene vamosa. Mwaha wa xeni? Hata mwa soovonya saya, Muluku onimwaakeliha ohoolo, 'okhala wira awo annaamini Ekeekhai ni aneetta ni Yeyo. Eyo ti Ekeekhai.

53 Masi exeni hiyo eniir'ahu vano? Munnona? Tivo hiyo ehikhalely'ahu muromolelo. Nto vekeekhai Pentekosite airomolakaru. . .

54 Nto okathi ottuli khalai, okathi Eroho Yowarya emwaraxiwaya wopaceryani mukereja Pentekosite, iyakha miloko mixexe sivinre, ni awo khupacerya olavula ilavulelo, emosa wa soovaha. Eyo ti yootepaxa oyeve wa soovaha. Eyo ti yooyevaxa wa soovaha, ntoko Paulo Owarya, olavula ilavulelo. Nto naanaanoru emalakaruru omora, "Oh," awo anira, "hiyo nookhalana Yeyo vano," nto khupaka muromolelo, Muthukumano w'Atthu othene, yowo okhanle vano Asempeleya de Deus. "Oh, khaavo orina Yeyo woohikhala wira onlavula ilavulelo," ni Muluku orookhuma naanaanoru mwa yawo, khwaahiya okilaathi vaavale. Vekeekhai. Ayo, mulopwana.

55 Ohoolo waya khikhumelela maUnisista, khuttemulela opatiiso ni Nsina na Yesu. Awo khwira, "Oh, hiyo nookhalana Yeyo," awo khwiitthokiha. Yiirale exeni? Muluku orookhuma naanaanoru khwaahiya okilaathi vaavale.

Eyo ti ya, "Khula mutthu onttuna, arweeke."

56 Moone, maUnisista khanrowa w'Asempeleya. Asempeleya khanrowa wa maUnisista. Miyo kootoko olavulana mmosa wa axilopwana oolokaxa awo arinas'aya, Mwenye Goss, ni Totori Pope, ni anci-ene. Axilopwana ari axilopwana aalupale muhina mwa. . . Miyo kahikilaathi ni yawo. Miyo khwira, "Muiniwerya sai wiixuttiha eyooniheryo ele yoopacerya, ntoko musomi?"

57 "Vano," khwira, "Munna Branham," mmosa, anli wala araru wa yawo, aari naxariya vekeekhai, khwira, "hiyo noosuwela wira ti yoovonyeya, masi niireke exeni? Hiyo nahimyaruru etthu p'itthu mwaha wa yeyo vano, vano, eyo enimweemeliha mutthokiheryo wothene." Vekeekhai, ni nyuwo khamunkhala-tho pixipu, wala mukhulupale aathu othene. Owo t'uri muupuwelo.

58 Munna, miyo kaamuthanla okhalana muteko mwaamukani vakompa, wala olaleya vathi va pinyeero, n'ukhalana Ekeekhai, vekeekhai, n'usuwela wira munihimya Ekeekhaii. Mutthu onttuna Ekeekhai. Ni nyuwo ntoko muKristu, muhaana, okhalela onamoona Ekeekhai. Muluku onoorowa wookhalihani namwaakhula mwaha wa yeyo.

59 Nto, mwa itthu iya, nyuwo mwiira muhipatisiwe ni Nsina na Yesu Kristu, ni muhinaire itthu iya, ni muhakhenle Eroho Yowarya. . .

60 Nyuwo munira, "Oh, miyo koolavula ilavulelo." Eyo khenihimya wira nyuwo mookhalana Eroho Yowarya.

61 Miyo kootoko owoona akhwiri, alopwana n'athiyana, axetwani, ni itthu sothene sikina, olavula ilavulelo. Vekeekhai. Awo kharina Eroho Yowarya, ni nyuwo munnisuwela yeyo.

Owurya ephome munikarakasani na muru wa mutthu, ni wiina, ni omwiihana xetwani, ni olavula ilavulelo. Vekeekhai. Awo kharina Eroho Yowarya.

⁶² Vano, 'okhala wira nyuwo moolavula ilavulelo, eyo khenihimya wira mookhalana Yeyo. Enamuna emosa ensuwel'anyu wira mookhalana Eyo, okathi eroho anyu enikhalel'aya onamoonna Eroho Awe, ni miteko sa Eroho sinimoottharani: ophentana, wamini, opuha, murettele, ovilela, oreera murima, wiisuumaliha, ohiviruwa pure. Owo p'ukathi onsuwel'anyu wira muhaana Eroho Yowarya. Eyo eniikhalela onamoonna Eneene.

⁶³ Vano, nyuwo mweereryaka omumula vasulu va, okhala wira munira mpantta wa Asempeleya, wala aPatista, wala wa maPrespiteriyano, munnona etthu eniir'anyu? Nyuwo munikuxa nsina na namuttompe. Eyo ekeekhai mara. Mukhumele ota w'etthu iyo. Murakamele etthu iyo. Nkinihimya ota w'ekereja anyu wala etthu p'itthu; nyuwo mwiire entthun'anyu mwaha wa yeyo. Masi muhiye olipana yeyo, "Oh, miyo ka Prespiteriyano. Hiyo khinnaamini mahiku a miiriirya." Muhinaamini mwaha wa xeni? Bibilia onniixuttiha. "Oh, miyo kinira mpantta wa Ekereja ya Kristu. Awo anihimya wira mahiku a miiriirya aamala." Awo maprofeta owootha.

⁶⁴ Miyo kinoowerya owoonihani vatthu Yesu Kristu ovahaly'awe Owerya Ekereja, wira yaavoniheke aretta, ni waahihimuxa ookhwa, ni owoomola axetwani. Miyo kinnimutannya mutthu ti mutthu akoonihe Yolempwa emosa mBibiliani vaavo Owo okumihaly'awe-mo yeyo Mukereja. Exeni ekumin'he-mo? Nikano nanyu, vekeekhai, kahi Masu a Muluku. Eroho Yowarya nlelo enniiriha muteko ovariva, erowaka ohoolo paahi vamosaru, ni Owo onimwiira mahiku othene.

⁶⁵ Tivo hiyo ehikhalenly'ahu muromolelo, "Wooneyaka ntoko oothunku, nave akhoottaka Owerya waya; awo muheettaneke." Hiyo khinnaamini itthu iyo.

⁶⁶ Vano, eyo epacenrye moota xeni? Hiyo nihaana waakuva niphierye vaavo vowaakuvaxa ntoko sinweryanyaaya vano, moota eyo epacenry'aya. Vano hiyo nookhalana Solempwa sinciene silempwe va mwaha wa Eroho Yowarya.

⁶⁷ Nto etthu ekina, hiyo naahitannya nsana ohiyu, mwa "nthiti na masantu," kahi mwa enamuna aPatista anaamini aya. Nnari, mulopwana. Miyo vekeekhai kinnivirikanyana na aPatista ni muupuwelo aya, w'otthokelela waya wa Calvinismu. Miyo vekeekhai kinnivirikanyana ni maPrespiteriyano. Miyo kinnivirikanyana na aMetotista vasulu va enamuna aya ya mwixuttiho wa Arminia. Ayo, mulopwana. Masi awo owanli aya aakhalana ekeekhai, masi nyuwo muhaana wiihokoloxerya Va vaavo vakhanle Ekeekhai. Okathi nyuwo onikhum'anyu vaavo, nyuwo munoopahuwa. Vekeekhai.

68 aPatista anookela, waapatisa anli va, yaapwinihaka; nto mulaleyi onimwaapatisa, athanu na axexe wa muloko annimupaha sikaro, n'utthika n'ukhala iwe, n'uttikha iturufu, cuuku ohiyu wothene, weettasa pure, ni anakoso oohikhala a xariya; ni athiyana othene yaawaraka akaputtula ota nno, yeettasaka pure mphironi, ametthaka maihi aya, ni—ni ampahaka sona ni alavulasaka, ni maira makhani a stitch-and-sew, ni olavula iperwa soonanara. Nyuwo muniihana eyo oKristu? Ni nyuwo munuupuwela wira mookhalana nrromelo Ohinimala? Nyuwo munoorowa omooroni siiso. Khamwaarowa orukuneya Wirimu hata vakhani. Vekeekhai nnari. Owo kahi nrromelo Ohinimala.

Masi mutthu ayariwaru vasya wa Eroho Yowarya . . .

69 Ni nyuwo aPentekosite, 'mwaha wo wira nyuwo mootupha osulu ni vathi, moolavula ilavulelo, mootthyawa nno ni nno munvireloni, eyo khenihimya wira mookhalana nrromelo Ohinimala. Muhikhalakhale muhelaka yeyo mmuruni mw'anyu. Nnari, mulopwana. Vekeekhai khenihimya yeyo. Okhala wira, nyuwo munnisuwela wira makhale—makhalelo anyu mmansinyu annookhalelani, onamoona, wira khamukhanle sana ni Muluku. Ti yeyo. Khamukhanle sana. Owo kuhiyo nrromelo Ohinimala, nlelo.

70 Masi miyo kintthuna kookoheni etthu emosa. Wookhala nrromelo Ohinimala? Bibilia onihimya siiso. Bibilia ohimye wira masina ahu aheliwe muLiivurini mwa Ekumi ya Mwapwittipwitthi nnakhala olumwenku ohinatthi opacerya.

71 Ntoko sihimaly'aka vaasiis'ula, miyo kinnihimya tho. Mulopwana ole olempe esipo, "Naahikhala nsina nsya nilempwe mOvuwani ohiy'ula, nto nno ti nawaka," muupuwelo awe waari wooloka, masi owo aahivonya, mwa Solempwa. Nsina nanyu khaniheliwe ohiyu mooponwe anyu.

72 Nsina nanyu, sintoko Bibilia, sintoko Wisuupulula 13, 17, ni sikina, "niheliwe mmo olumwenku ohinatthi hata opacerya; ni Yesu Kristu iiviwe ohinatthi opattuxiwa olumwenku."

73 Vaaweryaneya sai Muluku, Yowo ori oohimala, vaaweryaneya sai Muluku ohinimala, asuwenleene emalelo okhama wopaceryani, vaaweryaneya sai Owo otthuniherya etampi orwa mulaponi, yahaari wira naahikhala niwoko?

74 Wira nilipihirye paahi itthu kamosa kamosa sihimaly'ahu. T'uvi aari oopacerya, Moopoli wala natampi? [Mutthu mmosa vamuthukumanoni onira, "Moopoli."—Mol.] Moopoli, vekeekhai. T'uvi ori ooweryaxa, Moopoli wala natampi? Vaari wira Moopoli onniwerya ottipiha etampi, Owo t'uri ooweryaxa. Vano, Owo aahiyen'ryeni etampi okhala yoopacerya wiiraneya? Wira ooniherye wira Owo aari Moopoli. T'uvi ori ooweryaxa, mpenuxa wala muretta? ["Mpenuxa."] Mpenuxa. Nto Owo aahiyen'ryeni eretta orwa? Wira ooniherye wira Owo aari

mpenuxa. Miyo kinniisona okhala natiini naanaano va. Ayo, mulopwana. Oh, wulu! Iyo mikhalelo Sawe.

⁷⁵ Tivo Owo onihiy'awe mikattyamiho orwa. Tivo Owo onihiy'awe mixankiho orwa, wira oniherye wira Owo t'uri ohakalala. Vekeekhai, ti yeyo. Tivo hiyo nrinaahu ohiyu, wira wooniherye wira wookhala othana. Tivo hiyo nnikhalan'ahu onanariwa, wira yooniherye wira wookhala murettele. Vekeekhai, eyo ti yoocalela ni yoovirikanya. Oh, Owo t'othamaleya.

⁷⁶ Vano, eyo epacenrye sai? Hiyo nnorowa olukama yeyo, vowaakuvaxa ntoko sinwery'ahu, wira kihookhaliheni ohiyu wothene. Vano, ehaana okhala epaceryelo ya itthu sothene.

⁷⁷ Ni miyo kintthuna kookoheni ethhu emosa. Vano ela poti. . . Nyuwo muhele ela mukoletini mw'anyu. Khamurina y'ohela muparathuni. Masi nwiriyane ela.

⁷⁸ Nyuwo mwaari yoopattuxiwa Ehinimala, vano nyuwo khamunakhalaneke epaceryelo, wala khivanweryaneya okhalana emalelo. Maana, *Ehinimala* enirwa mwa nuulumo "ele ehirina epacerelo wala emalelo."

⁷⁹ Nyuwo khamunuupuwela? Miyo koohimya, vaasiis'ula, wira moota Melikisetekhi ule, okathi owo aakumanne awe ni Abrahamu akhumaka waawiiv'awe mamwene. Ni Bibilia oohimya, mwa aHeperi 7, wira—wira, "Levi aahimuliva Melikisetekhi sanamuloko, okathi waary'awe mmuthanani mw'atithi awe Abrahamu." Abrahamu aamuyanre Isakhi; Isakhi aamuyanre Yakope; Yakope aamuyanre Levi. Owo aari tithi, pwaapu, pwaapu aya atithi awe. Nto nlelo Levi aryeene mmuthanani wa apwaapu aya atithi awe, Bibilia onnimuvaha nttittimiho w'omuliva sanamuloko Melikisetekhi. Olavula wa Ehinimala! Wulu, wulu! Owo khanahimyeke wira, "Owo iirale ntoko eruku; owo mwa oweryaneya aahiira." Bibilia ohimye wira, "Owo aahiliva sanamuloko." Amen.

⁸⁰ Nto, hiyo natthararu epyo yekeekhai, okathi Paulo olalenryawe Ehapari yooreera miyo kaari vaavo ni nyuwo mwaari vaavo. Hiyo nnoorowa ophiyerya yeyo, minutu mmosa paahi, ohela mmaaruni mwahu. Nkawehani, ti yeyo Yolempwa ennihimer'aya, hiyo, hata otthikela ottuli.

⁸¹ Muupuwele paahi! Levi; arwaka Yakope, atithi awe; arwaka Isakhi, atithi awe; arwaka Abrahamu, atithi awe; apwaapu aya atithi awe. Okathi Levi waary'awe mmuthanani wa apwaapu aya atithi awe, owo aahimuliva sanamuloko Melikisetekhi.

⁸² Miyo kintthuna kookoheni nyuwo. T'ani ula, Yobi 27 . . . 38, okathi Owo iiraly'awe, "Mwaari vayi okathi Miyo kaahel'aka milipiheryo s'elapo? Okathi ittheneri s'oxaka siip'aya vamosa, ni aana a Muluku akhuwelaka mwaha w'otthapa?" Aana a Muluku awo yaakhuwela atthapaka yaari ani? Yesu ahaahimeerya, wira, "Miyo kaanithapa ni nyuwo ohinatthi opattuxiwa olumwenku."

Hiyo khanihiyo soopattuxiwa s'okathi. Hiyo na soopattuxiwa Sihinimala.

⁸³ “Khaavo onwerya orwa wa Miyo, ahikhanle wira Atithi Aka anoomuruuha. Ni othene ale anoorwa wa Miyo, Miyo kinimwaavaha Ekumi Ehinimala, ni omuhihimuxa mahiku ookiserya. Khaavo onwerya waakumiha mmatatani mw'Atithi Aka, Yawo akivanhe Miyo.” Munrowa opwetexa sai?

⁸⁴ Moone, nyuwo munootutuwa. Nyuwo munimoova. Nyuwo munootthyawa va. Nto eyo ti eyooniheryo emosa yoolokaxa, molumwenkuni, khamunakhale hata vatthu nlelo. Ti yeyo. Onwerya sai Muluku okhalakhala awoopolakani vaari wira Owo. . .

⁸⁵ Akavi mukereja mu munvenxa matata anyu, ni wamini wira Muluku t'ohimala? Nyuwo munnisuwela etthu nuulumo *ehinimala* nnihimy'aya? Eyo ti yooeera voomalela. Ehinimala, khivanweryaneya—khivanweryaneya otaphulela nuulumo *ehinimala*.

⁸⁶ Nyuwo mootoko omukuxa kaamera anyu khumuhela mpakha vale ohinimal'aya? Vano, eyo enihimya wira okhuma vaavale. Vaareera. Khivankhala enamuna w'omwaleiha tho.

⁸⁷ Vano, ti yeyo Muluku ory'awe. Owo t'ohimala. Nto vaari wira Owo t'ohimala, khivaaweryaneya okhala nikhutupu, nnakhala ephepele, nnakhala eyaasu, nnakhala etthupo, nnakhala munku, wala hat'etthu etonko okhala mulaponi, wala enrowa okhalakhala ekhalaka, ehikhanle wira Muluku aahisuwela hata olumwenku ohinatthi opakiwa. Wookhala muupuwelo mmosa wa ehinimala.

⁸⁸ Vano, nto, Muluku ohinimala Yowo oniwoopolani va, asuwelaka wira onoorwa woopwetexani esumana enoorwa, wala mweri onoorwa, wala mwahiyu, vano, Owo onoohonona etthu ene entthun'awe. Khivanweryaneya Owo woopwetexani. “Ole oniiwa Masu Aka, ni onimwaamini Ole okirumme Miyo, onookhalana Ekumi ehinimala ni khankhalakhala akelaka mOlamuliwani, masi okhumme mokhwani akelaka mw'Ekumini.” Khivanweryaneya. Nyuwo khamunrowa tho. . .

⁸⁹ “Ole oniyariwa wa Muluku khaniira etampi; maana epyo ya Muluku enikhala mwa Yowo, ni khivanweryaneya owo wira etampi.” Oniira sai etampi okhanlene mukuttho ovaheriwe etampi mwaha wa yowo?

⁹⁰ Eniiraneya sai miyo owereiwa kiryeene mw'ekumi yoomalela? Eniiraneya sai miyo okhalana evasi kiweryaka wona? Oh, wulu! Eniweryaneya sai miyo okhala mpani ni vate okathi mmosaru? Eniiraneya sai miyo okhala namuhapaliwa ni owiisumaaliha okathi mmosaru? Khivanweryaneya wira siiso.

⁹¹ Nto nyuwo moopowaru, munikhala vathi va Elevelo, ni itampi sanyu khamunaalakeliwa. David khahimnye wira,

“Ooreeriwa ti mutthu ole Muluku ohinimwaalikel’awe etampi, ni ohimmuhimyan’awe”? Muluku khonuupuwelela etampi ya mutthu Awe. Eyo ti yoolipa. Eyo kehiyo eleethi yookhamuliwa. Masi owo Bibiliaa. Muluku khonimwaalakela etampi naxariya.

⁹² “Muluku,” ni mahala Awe, ni otthoma, “ahitthunaka wira okhale aarowa opweteya, masi wira atthu othene erukunuxe murima.” Masi aryeene oohimala, ni asuwelaka t’ani aarowa orwa ni t’ani ahaarowa orwa, Owo aahiwerya otthoma itthu sothene wira seetteke ntoko otthuna Wawe. Vaari wira Owo khiirale, mwaha wa xeni Owo aatthuniheny’awe etampi nipuro noopacerya? Aryeene Moopoli. . . Vahaatonko okhala natampi, Owo khaarowa okhala Moopoli; mukhalelo, etthu yaari mwa Yowo, khivaaweryaneya okhumelela.

⁹³ Owo aarowa okhalakhala sai akhalaka mpenuxa? Owo aarowa okhalakhala sai akhalaka mpenuxa? Okhala wira Owo aahitthuniherya eretta orwa, wira Owo aisooniherye Mmansawe okhala mpenuxa. Owo aari mpenuxa. Moota xeni nyuwo mwaarwanyu okhala. . . Aarowa okhalakhala sai Owo asuweliwaka? Mukhalelo Awe waarowa ovara sai muteko? Aarowa okhalakhala sai Owo akhalaka mpenuxa, vaari wira khiyatonko okhala eretta? Owo aahaana otthuniherya eretta.

⁹⁴ Khivanxankiha, Paulo sihimaly’awe, mwa aRoma 8, “Mutthu oovahuwa, t’ani onwerya omuhimeerya mu—mulipaa—oowuupa etthu yo wira n’ila; t’ani, oloko waavenyaka ni wira, ‘Mwaha wa xeni, nyuwo, mukuupaka siisa? Owo kxanvenyinhe Farawo mwaha wa yeyo, wira Owo ooniherye ovuwa Wawe wEjitu? Owo onimulipiha murima ole Owo onimutthun’awe, ni onimulevelela ole Owo onimutthun’awe. Kahi ole onthhuna, wala ole onththaya, masi ti Muluku onooniherya ikharari.”

⁹⁵ Vano, nyuwo khamwaarina nata n’iyo. Nyuwo khamurina hat’etthu yo wira. Yaary’ene mahala, yaary’ene yoovaha ya mahala, khiyavo hat’etthu nyuwo eniwery’anyu wira mwaha wa yeyo. Muluku ohoovahani nyuwo, ni owo otthuna wa Muluku. Eyo etthu Muluku ootthomenly’aweni.

⁹⁶ Bibilia ohimye wira hiyo “nrootthommwa wira nikhalihewe aana, aana a Muluku, ohinatthi opattuxiwa olumwenku.” Nto, okathi Muluku omwiivaly’awe Mwapwittipwitthi, mmuupuweloni Mwawe Mwanene, ohinatthi opattuxiwa olumwenku, wira ooniherye mikhalelo Sawe, etthu Owo aary’awe; okathi Mwapwittipwitthi iiviw’awe, hiyo niiviwe ni Yowo. Okathi Ephome ya Mwapwittipwitthi ekuxiw’aya mmuupuweloni Mwawe Mwanene, ottuli wu ohinatthi opattuxiwa olumwenku, nsina naka ni nawinyu yaahilempwa muLivuruni nto, othene mwa muupuwelo Awe muulupale.

⁹⁷ Owo t’ohimala. Owo ahaakhanle, mwaha wa xeni Owo otthuniheny’awe? T’uvi orina ikuru, (miyo koohimya,) Moopoli

wala natampi? T'uvi orina ikuru vancipale? Nto, naikuru aahaana omutthuniherya ole ooyeva, ni Owo oniira eyo paahi wira okhale ovuwa Wawe. Okathi Owo omupattuxaly'awe Lucifer, Owo aahisuwela wira aarowa okhala xetwani. Owo aahaana omuhiya okhala wira ooniherye wira Owo aari Moopoli, Kristu. Owo aahaana ohiyererya wiiraneya siiso.

⁹⁸ Vano, Bibilia kxanihimya, wira, "Itthu sothene sineetta vooreerihiwa ale animphenta Muluku"? [Muthukumano onira, "Amen."—Mol.] Vano nyuwo muntuthuwani?

Nrowe nivenye niiraka,
Ni murima mmosa mwaha w'ekhotto.
Muhikhale ntoko inama sineettihiwa soohiiwa,
sookhala sooxontteliwa ni otumereriwa!
Ni mukhale ookhomaala!

⁹⁹ Miyo okisivela eyo. Nvenye! Nsipo naamukhani nenlo naakikhaliheriyaka vanci-ene okathi wary'aka mwanamwane, nniyiwa so:

Aahikhala muRoma mukhulupale,
Mahiku a Mwene ooRoma;
Yowo aamwiiwa namukhoronowa namoova,
Ohoolo w'ekastelo ohimya wira:
"Oh, ti woolipa mmwirini mw'apeeto,
Khaavo onwerya ottikinya."
"Oh, nnari," ohimnye ti mulipa-ookhomaala,
"Miyo kinoophwanya ephiro wala opaka."

¹⁰⁰ Eyo eri vo. Ti yeyo. Vaari wira Bibila ola oniixuttiha wira Yesu Kristu mmosaru nsana, olelo, ni mahiku othene. . . Khayaari etthu yookhweya okathi miyo waakhumaly'aka vowaakuva etapernakulu ila nihiku nle, ni atthu othene akihimeeryaka wira *ela* yaamukhumelela, *n'ile* yaamukhumelela. "Nyuwo mwaamurowa owehiwa ntoko namasivelasiwa, ottikheliwa mukhatteya, ni nikhuru nothene na matothoro okhala oovirikanyana ni nyuwo." Masi Muluku khwira mwiire yeyo. Bibilia ohimnye wira Owo aari yowo. Nto vano moro wa muhakalaliho onivarela khula elapo vathi v'Erimu. Mwaha wa xeni? Nvenyerye yeyo!

Munivara sai muteko anyu khula nihiku?
Murootuthuwa muteko nyuwo
muphwanyaly'anyu?
Munniwerya ovenyerya muteko ori ohoolo
wanyu?
Nyuwo murina muupuwelo wootteettheya ni
woohikhala etthu? (Miyo okinanara etthu
iyo.)
Wala nyuwo munnivenyerya muteko ori ohoolo
wanyu,
Wala woova ori mwa yowo mahiku othene?

Vaari siiso, muvare ole oniphwany'anyu
ohoolo,
Muupuwelaka wira munoorowa ovara.

¹⁰¹ Mukhale ni yowo. Vekeekhai. Mukhalane mmurimani mwanyu, ntoko Daniyeli. Mukhale ni Muluku.

¹⁰² “Sothene iya siiranan'ye vai? Siiranan'ye sai? Exeni enaakhaliha atthu siisa? Mwaha wa xeni hiyo nnihalet'ahu olikana wira nitholoxiwe? Munna Branham, mukitaphulele. Exeni eniwuupuwelihani wira etthu ila yothene ehaana okumihiwa?” Eyo yaahitoko okumihiwa emara emosa khilai, (eyo ekeekhai?) ohononiwa wa mutaseke. Vano va sinoorwa itthu kamosa kamosa soowiixa. Nto hiyo nnoolikana wira nisome.

¹⁰³ Vano kintthuna mukhunle ni miyo vano, muLivuruni mwa Maphattuwelo, kapitulu 3. Mwaatthunaka osuwela etthu p'itthu, miyo poti owoonihani muLivuruni mu mwa Maphattuwelo vaavo khula okokhorela ni khula ismu, ni khula etthu hiyo nrin'ahu olelo, sipacenrye mwa Maphattuwelo. Akavi ansuwela wira *Maphattuwelo* enihimya “opacerya”? Vekeekhai.

¹⁰⁴ Hiyo ninniphwanya ekereja Katolika wopaceryani, Papilonia, Nimurode namuteka; hiyo ninniphwanya eriyari ya Bibilia, hiyo ninniphwanya wokiseryani wa Bibilia; hiyo ninniphwanya, weererya waaruuha athiyana alaleyi, wopaceryani wa Bibilia, mwaha w'okokhorela itthontto sikhaani soopakiwa ni mitathari. Akavi atonko osoma iye sa Hislop, *aPapilonia Anli*, wahala owo? Vaareera. Muphwanya, muhina wa awahala ala. Awo yaahikhalana muthiyana mmosa... Nto vo, nyuwo munnuupuwela? Hata Yakope aahiwiya amuluku a atithi awe, ni mwan'awe mwamuthiyana khwaavitha vathi vawe khwaakuxa aaroihaka iwe mothakoni, yeyo yaananarin'he muttethe, ohoolo waya. Vaareera.

¹⁰⁵ Nrowe nisome va vano mwa Maphattuwelo.

Vano enowa yaari mulavilavi ovikana inama sothene sa mutakhwani APWIYA Muluku saapattuxaly'aya. Nto eyo yaahimwiirela muthiyana wira, Ekeekhai, Muluku oohimya, Nyuwo muhilye miri sothene sa mmatta?

...muthiyana khuhimeerya enowa wira, Hiyo ninniwerya olya mihokorokho sa miri sa mmatta:

Masi muhokorokho wa mwiri...eriyari yematta, Muluku ohimye wira, Muhilyeeru, nnakhala muhivare-ru, ahiso munimookwa.

Nto enowa khumwiirela muthiyana, Vekeekhai nyuwo khamunookhwa:

Maana Muluku oroosuwela wira nihiku ninrow'anyu olya, nto maitho anyu anoothukuwa, (moone, aphaavelaka Muthuko musya), ni nyuwo munookhala ntoko amuluku, musuwelaka oreeriwa n'utakhaliwa.

106 Munnona moota apatthani ala siry'aya olelo, yeereryaka okumiha-mo mBibiliani? "Vano, kahi yookhweya oyeeherya paahi, wala omiserya, wala *sa*, wala *so*?" Nnari, mulopwana. Muluku oopaka mutthokiheryo, nto ti yowo entthuneya hiyo otthara, *Ola*.

Nto muthiyana voonalyawe wira mwiri ule waanireerela olya, ni wira waari woosivela oweha, ni mwiri wo wira opake. . . wootthuneya wira otthukule muru, owo aahirukula muhokorokho, khulya, ni khunvaha-tho iyawe aarinaawe; n'owo-tho khulyaka.

Nto maitho aya oowanli yaahitthukuwasa, ni khusuwelasa. . . awo khiyaawanre etthu; nto awo yaahitthavasa mataakhuru a murale, khupaka ikuwo saya.

107 Miyi kaatthuna keemele vava minutu mmosa. Vano, ehaana okhala epacerelo sa itthu sothene. Nyuwo mookhalana epacerelo. Vano hiyo. . . Va ti vatthu kintthun'aka olipiherya-vo etthu yothene, vano, hiyo ninnilavula mwa yeyo mithukumano iya miili sookiserya, ni mpakha va.

108 Vano, vaasiis'ula hiyo nootthika khuhimiyaxaxa, mBibiliani, wira okathi Muluku waapak'awe elapo, wira okathi Owo aapak'awe ikaaxi; nto vo ikaaxi iyo khukhala kalsio, ni potasio, ni—ni itthu soovirikana. Owo aapaka erutthu anyu. Owo eemexa empa, ntoko funti muulupale namateka, ntoko namateka eemexaka ikaruma sawe wira ateke muteko awe w'empa. Owo aapaka erutthu anyu, ni Owo aahikhalana eyo erylene vale. Owo aanisuwela vekeekhai oratteene, mmuruni Mwawe, etthu yaarowa opakiwa.

109 Ntata *nla*, Muluku opanke ntata nle Owo ohinatthi. . . okathi Owo aapak'awe olumwenku; masi, eroho aka Owo opanke ohinatthi okhala olumwenku. Vano, masi ntata *nla* n'irutthu ila, Owo opanke okathi Owo opanke awe olumwenku, 'okhala wira erutthu ila ekhumme vatthayani, ni entthikela vatthayani. Muluku opanke yeyo. Owo aahenle eyo yothene mmpalantani Mwawe yuulupale ni mutthokiheryo Awe.

110 Vano, Owo arowaka apakaka elapo, Owo aahimpaka mutthu, nave mutthu khooneya oratteene. Vano hiyo nihooniherya eyo, vaasiis'ula, nootholathola yookhumelela, moota a—a Atithi yaakhurunwe aya khunweha mwana Aya, khumpaka yiilattanihaka Yawo, ni sikina. Nto Awo yahimpakela mwara, namakhaliherya.

111 Vano, muupuwele, wira, soopattuxiwa sothene sa mulaponi, Adamu aahivaha masina seiyo.

112 Owo aahipattuxa i—imompe, ni inama, ni itthu sothene. Nto olelo, hiyo. . . Makronoloxista ni—ni miyuupuwelo suulupale sa siensia, anikhala yeereryaka, mwa iyakha ikonto thanu na mosa, ophwanya nlutte nihaleela, mwaha wa xeni enam'eyo. . .

Mutthu ti ekumi ya enama. Hiyo noosuwela eyo, wira hiyo nipakiwe. . .

113 Nto muthiyana epantte ya mulopwana paahi, muhokorokho wa neenli. Muthiyana khaakhanle m'opattuxiwani woopacerya. Muluku aahihiya opattuxa, mwa iyakha ni iyakha ni iyakha, mpakha Owo ompaka muthiyana amukumihaka mpararini wa mulopwana. Adamu aahivaha masina soopattuxiwa sothene, itthu sothene sikina, masi owo kharina hat'etthu yawawe yowo. Tivo, Owo khumpakela namakhaliherya; aakunxe niparari mpararini mw'awe, khuttyela nikhwatta, nto khumpakela namakhaliherya awe. Nto mulopwana, murohoni mwawe, aari soopiili mulopwana ni muthiyana.

114 Nto muthiyana mpantte wa mulopwana paahi. Nto okathi mulopwana onimukux'awe mwar'awe, nto owo akhalaru mwar'awe oratteene, mwara oovahiwa ni Muluku, owo onrowa okhala oororomeleya ntoko mpantte awe.

115 Tivo nyuwo murin'anyu mikattyamiho sinci-ene mothelanani, okhala wira nyuwo munookhuma n'umoona mwali mmosa ni maitho ooreera a ncano wala a maitho ooripelela, wala etthu ntoko yeyo, ni ekhalelo emosa yooreera, vano nyuwo munsiveliwa ni yowo. Emara yoopacerya owo onikhalan'awe mwan'awe oopacerya, maino ale anoomora, nto owo onikhala ni manyari ni owuuluvala, nto vo nyuwo muntthuna oomomola. Nto akina a nyuwo axithiyana munimphwanya mmiravo mmosa ni maihi awe oothereryela vathi, ni nlaatha nawe na makhura na amey'awe ootikittheliwa yawo, ni oonyokotowa. Nto awo othene anoomora; miyo koosuwela eyo ni musuwelelo. Masi exeni eniiraneya? Exeni iyo? Nyuwo munsiveliwa ni yeyo.

116 Nyuwo mwahaana olompa, toko, 'okhala wira muthiyana mpantte anyu. Nto nyuwo mwampatikharu muthiyana vatthirima vanyu, ni khumukuxa wira akhale mwar'inyu, ni nyuwo. . .Owo onihya malepa mwa nyuwo. Hiyo nnoohimya siisa wira nyuwo miwe sana. Nto muthiyana mukina vatthirima vo kharowa olikana ni nlepa nno. Nto Muluku onimookhalihani owaakhula mwaha wa yeyo. Nto nyuwo muupuwele yelo.

117 Nyuwo munimukuxa mwara a mwanene ni. . .Miyo kishiwa olelo mwaha wa mwaarusi mmosa opoma nno, etthu yaamukhani. Miyo kinnimusuwela. Ni nacuuku mmosa amuthumelaka ikuwo sooreeraxa, ni itthu, ni eereryaka omuvara murima siiso. Nikhule, aamwiira etthu ntoko yeyo, khivanweryaneya oomona ntoko mutthu.

118 Nyuwo moosuwela, mwalapwa kahi ootakhala siiso, nlelo nyuwo munimwiihana mai mwalapwa "oohicaliwa." Owo t'olakeyaxa waavikana nusu n'axithiyana ooJeffersonville sihikhanly'aya. Ni nyuwo munimwiihana mai kuluwe "kuluwe, eethiyana" ni owo kahi. . .Owo t'olakeyaxa waavikana axithiyana a Estadu Unidu, anci-ene a yawo. Eyo ekeekhai.

Vano, miyo koosuwela wira eyo ti yoohiloka. Ni miyo kihooleelani wira miyo kaarowa onyanyasa owani, vano kintthuna wira nyuwo musuwele. Nto eyo ekeekhaii. Awo othene, axithiyana mahiku ala, hata khansuwela olakeya exenii. Khwiiriwa, "Muhikisikulihe muupuwelo aka." Ahe, nyuwo khamurina hata mmosa. Nwehe. Ayo, mulopwana. Okathi, ensuwel'anyu yooreera ni yootakhala.

¹¹⁹ Vano nwehe. Mulopwan'ola, okathi opattuxiw'awe, Muluku aahivalaanya eroho awe. Nto Owo aakunxe nipattuuxa mwa mulopwana, niparari nawe, khumpaka muthiyana ni nenlo. Nto tho Owo khikuxa omuthiyana, eroho yoophwaneliwa ya mulopwana, khumpaka muthiyana ni yeyo. Nto Owo khumpaka mulopwana oolopwana, oolipa.

¹²⁰ Nto nyuwo mwaamoonaka mu—mu—mulopwana ori vakhani . . . nyuwo moosuwela, areerihaka ikatha, wala etthu p'itthu nyuwo eniihan'anyu, makhope awe a mmtatani; ni, nyuwo moosuwela, xexe epantte emosa ni thanu epantte ekina, ni—amoroxelaka maihi awe vathi; wira alume eyano awe ohoolo, ni itthu ntoko yeyo; mmosa wa aximiravo ala ooreera. Nyuwo muupuwele paahi, murokor'aka, yookhala etthu evonyen'ye ni mwapalame owo. Yookhala etthu evonyen'ye. Vanreerela mmuwehaxaxe sana yowo.

¹²¹ Ni nyuwo mwaamoonaka muthiyana ni sikaro amuphimpeene mwano mw'awe, ni anwanreene makakau, ni iiraka, "Miyo kinimooleelani, namaphaca ikhuni, ele exeni!" Munna, nyuwo mmuwehaxaxe mwamuthiyan'owo. Yookhala etthu evonyen'ye ni yowo.

¹²² Muthiyana, vaatthuneya akhaleke muthiyana, ni vantthuneya owo awareke ntoko muthiyana. Okathi Muluku omupank'awe mulopwana, Owo omupanke etthu emosa, ni Owo omupanke muthiyana etthu ekina. Ni Muluku aamuwarihaka mulopwana, Owo omuwarinhe enamuna emosa, ni muthiyana etthu ekina. Ni Bibilia ohimmye wira, "Ti yoonanara muthiyana owara ekuwo eri ya mulopwana."

¹²³ Nto nyuwo axithiyana, muniwara ikalsa iya saamukhani n'itthu siiso, ni muwaraka seiyo ota nno, yootikiniha vakhani . . . Nyuwo muniuhana exeni seiyo, knickerbocker? Exeni awo . . . ? Oh, exeni etthu iyo awo . . . ? Nnari, nnari, kahiyoy akaputtula, iyo t'iyey sikina, sirina metto soorakama. [Muthukumano onira, "Pedal pushers."—Mol.] Pedal pushers, ni amakakau, afato-makaku.

Ovolowa, khwiriwa, "Iya ti sa athiyana."

¹²⁴ Miyo khwira, "Nnari, nyuwo moovonya. Ahano khanwara itthu iyo. Athiyana anoowerya, masi ahano nnari." Ti yeyo.

¹²⁵ Bibilia ohimmye wira, "Etthu yoonanara muthiyana owara ekuwo . . . ni mulopwana owara ekuwo eri ya muthiyana."

¹²⁶ Nto mulopwana onootepa okhala mulopwana-thiyana, khula nihiku, ni athiyana anikhala athiyana-alopwana. Mulattu aya t’uvi? Nnoorowa osuwela mwa minutu vakhani, ni Bibilia. Athiyana khahiyo-tho athiyana. Miyo nkinoohimani nyuwo athiyana aKristu. Miyo kinihimya mweettelo w’atthu othene. Awo antthuna yiireke ntoko alopwana; antthuna amettheke maihi aya ntoko alopwana; ohela matata aya vankoponi, *siiso*, ni omwiipa *Muluku Amureerihe Amerika*, ni sikaro okutoni w’eyano.

¹²⁷ Okhuruwela mphironi, ohokolowa *siiso*, naanaanoru muramphani. Hiyo naahaalaka. . . Miyo kintthuna kooleelani etthu emosa. Ni nyuwo axithiyana muneettiha ikaro, nwiriyane. Billy Paul ni miyo, ekampanya ela yookiserya mulaponi, miyeri mithanu na mosa, miyo kaahikhalana eyaalikelo ya mikattamiho muramphani. Nto mwa ihasara imiya tthaaru, muramphani, munnaanyiherya wira kavi mwa seiyo yaari athiyana oweettiha ikaro? Yaahala emosa paahi. . . Muloko ni athanu n’axexe mwa yawo yaari alopwana. Nto imiya piili ni miloko mithanu na miraru wala, kookupali wira yaari *siiso*, imiya piili ni miloko mithanu na miraru ni mmosa yaakhala athiyana aneettiha ikaro. Athiyana aneettiha ikaro! Vano, miyo nkinihimya wira khakhanle athiyana aneettiha ikaro oratteene. Masi owo onoorukunuwa mwa khula enamuna.

¹²⁸ Nto nyuwo muneererya omunlela ikuhu? Mmuhiye ooriheleni maitho vooreera-vo, eemenleene vale, akakhelaka maihi ale osulu okathi mupilisa onoorw’awe. “Vano,” owo onimwiira, “vekeekhai, nyuwo moovonya!” Hmm! Hiyo khanrina hata nlamulo.

¹²⁹ Awo yahooniherya eyo nihiku nno mwa eliveryo ya mpoosito mwemmo miyo omanly’aka ovira-mo. Hiyo khanrina malamulo. Saakhanleene. . .

¹³⁰ Khivanxankiha mamwene a oInglaterra yaahimya wira, “Demokrasia yaari matthanka nave oohikhalana nankura.” Ti yeyo, weemela vakaaxa ya esapau, okela voviilipiha mukampanyani ya mwaathanle. Demokrasia ohintta, ni *siiso* t’ary’aya alipa ooruma ni yothene aya. Etthu yothene ti yowuntta. Khekhanle hat’etthu woohikhala emosa wira *Muluku iire*, ohonona etthu yothene, ntoko Owo sihimaly’awe wira Owo aamwiira, ni apacerye esya. Vano nwehe moota mwaattamenly’anyu Orwa.

¹³¹ Vano okathi muthiyan’ola. . . Owo aamupakenle namakhaliherya awe, ni yaari wira owo akhale namakhaliherya awe. Nto vo. . .

¹³² Vano, va, miyo nkinatoko okhalana mulaleyi onkupali yela nlelo. Nto awo aneererya opaka enamuna ekina, masi nlelo eyo khena maana wa miyo. Awo aneererya ohimya wira Adamu ni Hawa yaakhunre masaa. Munna, vaari wira. . . miyo nkinihimya

ela ntoko eperwa vano, masi kintthuna kihimye. Maana, vakhala wira okhuura masa onnaasuveliha athiyana wira khawanre etthu, vanreerela hiyo naavahe-tho masa. Ni nyuwo moosuwela wira eyo ekeekhai.

¹³³ Nyuwo moosuwela, okhuura masa, eyo kahi ile awo yiirans'aya, yaasuvelin'he wira khiyawanranse etthu. Vekeekhai, khayaari yeyo. Yaahaana orwa mwa enamuna y'ekhapa. Yaahaana okhala, 'okhala wira awo yaahisuwela wira khiyawanranse etthu okathi alyanse aya muhokorokho ola wookhottihwa. Muthiyana kahiyo mwiri wa muhokorokho? Nyuwo khamuhiyo muhokorokho w'amey'anyu? Owo ti waari muhokorokho waakhottihwe oyiwa.

¹³⁴ Vano va yookhala etthu yuulupale. Vano etthu yoolikanexa siensia otonko awe ophiyererya asuwelaka etthu mutthu aary'awe. . . Awo aathipula makhuva a khalai, awo anikuxa itthu soothipuliwa, ni anikuxa miru, ni anikuxa makarakasa a miru, ni miyoono, ni makhuva, ni weererya okhaliha oolikana ntoko mutthu. Ni awo annisuwela wira etthu yoolikanexa awo atonko aya omphwanya mutthu, yoomukhuveela yowo, kholee. Owo ti muxovo woolattanexa ni mutthu; masi nlelo owo kahiyo hat'etthu ni mutthu, muulupalexa.

¹³⁵ Mukhalelo w'ekumi wooyevaxa okhanle ti naphulu; mukhalelo muulupalexa ti mutthu. Muluku aapacenrye vathi nto khupaka mpakha osulu, mpakha Owo ophiiherya ethoni Awe. Okumihenrye mwa axipalame n'axinama, erowaka osulu, mpakha Owo okhalana ethoni ya Muluku. Owo khumpaka mutthu mwa ethoni ile. Owo mukhalelo muulupalexa. Mukhalelo wooyevaxa ti narokhinya okhanle naphulu, ni sikina.

¹³⁶ Vano, nlutte nla nnihaleela, awo ahinwery'aya ophwanya. Nwehe Solempwa vano. Nyuwo, nyuwo munoorowa ohikupali ila, anci-ene a nyuwo, masi miyo kintthuna . . . miyo kintthuna paahi nyuwo mukhalane ela mmuruni. Ni muhikhale oolamula yela. Nwiriyan.

¹³⁷ Miyo koosuwela wira anci-ene a nyuwo annimuwiriyana paahi Totori DeHaan. Miyo vekeekhai. . . Ntoko mulopwana a mukhalelo awe, ni munna mmosa ooreera murima muPatista, ni miyo vekeekhai kinnimuttittimiha owo. Owo ookhalana osuwelaxa ni ankhili, ni—ni kooliyala tho ovikana saarowa'aka osuwela; 'okhala wira owo Totori a—a Divindad, ni owo tothoro a oxipiritali, ni owo Totori a Siensia. Owo mulopwana mmosa musuweli. Masi owo onihimya wira ale . . . Okathi aana a Muluku yoonaly'aya wira aana axithiyana a atthu yaari ooreera; owo onikuxa mweemereryo wa Josephus, ni wira wira "awo—awo yaaikelin'he mw'erutthuni mw'atthu," khwaakuxa axithiyana ale khwaathela. Ni yaahikhala atthu oorakama elapo y'oNodi. "Nto awo yahaakuxa axithiyana khwaathela khiyakhala ni yawo, okathi aana a Muluku, Malaikha yaamonre, khwaakuxa

ni kiwoona aana axithiyana a atthu; ni etthunelo y'ekhapa yaari etthu yuulupale, nto nlelo awo aryeene anatampi mwaha w'omora, awo khwiikelihwa mw'erutthuni mw'atthu."

¹³⁸ Vaari wira yiinre yeyo, awo anoohonona ovoniha wa Muluku, awo anoohonona itthu sikina sothene. Vaari wira xetwani onniwerya opattuxa, owo onoolikana ni Muluku. Xetwani khanwerya opattuxa. Miyo kintthuna nyuwo mukoonihe nipuro nimosa vaavo xetwani onwery'awe opattuxa. Owo khanwerya opattuxa. Owo onohonona paahi ele epattuxiwe. Owo kahi mpattuxa. Owo namahonona paahi.

¹³⁹ Vano, nto, exeni yiiranen'ye? Nkawehani. Va t'uri otaphulela waka. Va ti nri nlutte nle nnihaleela.

¹⁴⁰ Vano awo aakhalana khole, masi khivanweryaneya omutakaniha khole ni muthiyana khimuyara mwana. Khivanweryaneya omutakaniha mutthu ni mwaxinama. Khantakanihana. Khivanweryaneya ovahiwa ephome, ya hata mwaxinama.

¹⁴¹ Okathi waary'aka wAfrika, awo yaweettiha siiso atthu ale oohaawa ni ooripa; mutthu mmosa khukihimeerya, khwira, "Awo khahiyo hat'etthu woohikhala axinama."

¹⁴² Miyo khwira, "Miyo kinoovekelani mukilevelele. Ale atthu vanci-ene vekeekhai ntoko nyuwo siry'anyu, alakela oovikana vakhani." Mukihiye kooleleni, nyuwo mwakhalanaru mweettelo yowo, nyuwo muntthikela okhala mwaxinama. Miyo khwira, "Mulopwan'ole, vaari wira ole t'oriipa ntoko aaxi a xipaasa, wala owo aari a ncano ntoko marapo, wala owo aari ooripelela ntoko mwiri intiku, owo onniwerya woopola ekumi anyu oovahakani ephome. Masi muhikhalakhale muhelaka ephome ya mwaxinama mwa nyuwo." Vekeekhai, ole mutthuu.

¹⁴³ Mwaha wo wira esapala ekina yaari yooriipa, ni ekina yooxeerya, ni ekina ya ncano, ni ekina yooteela, eyo khena nata. Biblia ohimnye wira, "Muluku ni ephome emosa ohaapaka atthu othene." Ni eyo vekeekhai ekhweeli. Mapuro hiyo naakhal'ahu, arukunxaka mithinto sahu, khena nata ni yeyo. Muluku omupanke mutthu—mutthu mmosa ilapo sothene, ephome emosa, ilapo sothene emosaru.

¹⁴⁴ Aciina; mutthu ooweela khanwerya wira vano, mutthu ooriipa khanwerya wira vano, wira, "Mulopwana Muciina ole, ole—ole t'ancano, miyo nkinrowa okhalana nata ni yowo." Owo ti munn'inyu. Ni nyuwo mukunya muhimwiireleke mutthu a ncano wala mutthu ooriipa, hata mmosa, "Miyo nkirina nata ni nyuwo." Owo ti munn'inyu. Vekeekhai ekhweeli.

¹⁴⁵ Nwehe, vano, va eri ele yaakhumelenle. Miyo kookupali, ni kinniwerya okhaliherya ni Bibilia, wira ti enowa yiirale yeyo. Enowa ti mutthu uwo onihaleela ori eriyari ya khole ni mutthu. Okhala wira, nwiriyane, nwehe ela vano, wira enowa

khayiipurulaka. Eyo ti yaakhalanxe “mulavilavi” ovikana inama sothene sa mutakhwani.

¹⁴⁶ Vano, miyo kaahirowa kikuxa otaphuleliwa wa moolumo, olelo, a mapuro othene, wira kiwehe nuulumo nla, etthu nuulumo *mulavilavi* nnihimy'aya. Nlo nnihimya “okhala oocencera, okhala namawoka,” ni, otaphuleliwa woolikana na e—e eHeperi (ya m-a-h-a-h, mahah) nnihimya “okhalana osuwela w'ekeekhai w'epacerelo y'ekumi.”

¹⁴⁷ Vano nrowe niwehe ela minutu mmosa paahi. Owo t'ocencera, namawoka, onamwi aihaniwaka “enowa.” Masi, muupuwele, owo aari etthu yocenceraxa yaakhanle, ni oolattanexa ni mutthu ovikana eetthu p'itthu ekina yaari omatta; oolikanaxa ni mutthu. Owo khiipurulaka. Otakhalihwiya t'emukhan'he owiipurula. Ni owo aari ti...Bibilia ohimmye wira eyo yaari yooreera wa sothene.

¹⁴⁸ Ni nnakhala otakhalihwiya khokumin'he oreera waya wothene; nlelo makhwili owaarya eenowa t'oreera, ni ophwaneliwa waya ni elavilavi aya. Nnakhala otakhalihwiya khokumin'he eyo. Masi, muupuwele, Muluku aahimenrye wira metto saya saamukhumihwiya ni eyo yaarowa wiipurulaka ni erukulu aya. Ni nyuwo khamumphwanyana hata nikhuva mw'enowa ninlikana ni mutthu, nto tivo siensia orimenly'aya. Masi ele eri vale.

¹⁴⁹ Muluku orimwiipithiherya maitho a ale osuwela ni a miruku, ni khuhimya owuupululela aana a Muluku, mahiku ookiserya okathi aana a Muluku anrow'aya wooniheriwa, okathi, “Aana a Muluku yale yaatthapa hata ohinatthi opattuxiwa olumwenku.” Okathi muupululo muulupale w'oMuluku ni itthu saarow'aya okumiheriwa mahiku ookiserya, Owo aamurowa wooniherya itthu iya mwa aana a Muluku. Nyuwo moosuwela wira Solempwa sinniixuttiha yeyo. Nto hiyo nri va. Tivo Muluku onnitthukulel'awe itthu iya hiyo. Muluku onaaruha aana Awe wooniheeriwa. Owo onoorowa khuvikana onimalel'aya osuwela wa mutthu ti mutthu, mpakha wuupululiwa wa muroohonni, n'ukumiherya Yeyo. Hiyo khanikhanle niixuttihaka, mBibiliani mu, “Ola ori va w'ale arina ankhili”? Kahi etthu owo iixuttaly'awe osemiariu; masi ele iixuttaly'awe mmakuthani mwawe ohoolo wa Muluku, ni etthu emusivenle Muluku omuvaha yowo. Aana a Muluku, owooniheriwa!

¹⁵⁰ Va eniphwanyaneyana enowa, vano va eniphwanyaneyana etthu enowa yaary'aya; miyo kinrowa wooleliheryani yowo.

¹⁵¹ Hiyo nookhalana...hiyo nnoorwa, okhuma naphulu, mpakha wa narokhinya ole, nrowaka nikhuruwelaka nrowaka, ni *khata-ni-khata*, mpakha wookiseryani nyuwo omphiyerery'anyu khole, elupa. Nto okhuma elupa, vano hiyo nnootupha okhuma elupa mpakha wa mutthu, nto hiyo nnooxanka mwaha wa xeni.

¹⁵² “Vano,” siensia oniira, “vano nwehererye! Hiyo pooti omutakaiha muthiyana ni khole, ’ni elupa, ni siiso nno ni nno, mutthu otakanihiwa ni khole.” Khenvara etthu. Mmutakanxe ni mwaxinama mukina; khenivara etthu. Ephome khenrowa otakanxana; mukuxe ephome anyu, eyo ephome yoovirikana voomalela, voomalela.

¹⁵³ Yookhala ephome eriyari va, ni awo khanwerya omphwanya mwaxinama ene. Oh, Aleluya, miyo kinoorowa wiisoona okhala natiini naanaano va. Nwehe. Mwaha wa xeni? Muluku oroowiipithiherya awo. Khinaavo nikhuva mw’enowa ninlattana nnikhuva na mutthu. Owo ohenle etthu iyo ottaiwenexa wira ehiwerye ophwanyiswa n’atthu oosuwela.

¹⁵⁴ Nto miyo kinrowa owoonihani vatthu mutthu uwo oocencerya onikhum’awe-vo, vatthu—vatthu vary’awe, khula enamuna. Moone, khivanweryaneya owo orwa mwa yeyo.

¹⁵⁵ Eyo ehaana orwa ni muupululo, “Nyuwo mwa Kristu, Mwana a. . .” “Vamwala va Miyo kinooteka Ekereja Aka; ni mikhora sa mokhwani khasinwerya oxintta,” muupululo wa murohoni. Moota xeni—moota xeni Abeli aasuwenl’awe onvaha mwapwittipwitthi, omuhiya Kayini avahaka mihokorokho sa mmatta? Eyo aarimuupululeliwa murohoni. Nyuwo khamunsuwela ni iseminariu. Nyuwo khamunsuwela muhina mwa miromolelo. Nyuwo muniphwanya okhuma Wirimu.

¹⁵⁶ Vano nkawehani enowa, enowa ela yaari yoopacerya. Nrowe nikwerethe elatarato aya vano. Owo mutthu mmosa muulupale. Owo ori eriyari ya khole ni mutthu. Nto, enowa; xetwani, Lucifer, aanisuwela wira ele ti yaari ephome emosa yaarowa otakanxana n’iphome ela ya mutthu, mutthu mmosa owo aawery’awe ovarana muteko. Owo khaawerya ovara muteko ni khole, ephome ele khayaarowa otakanxana. Owo khaawerya ovara muteko ni itthu soovirikana. Owo khaawerya ovara muteko ni epwittipwitthi. Owo khaawerya ovara muteko ni ekhavalu. Owo khaawerya ovara muteko ni hata mwaxinama; owo aahaana ovara muteko ni enowa ela.

¹⁵⁷ Nrowe nikuxe vano noone etthu enlattanan’aya. Owo mutthu muulupale, a okathi ohinatthi opacerya wahala. Ti vaavo awo aniphwany’aya makhuva ala maalupale, ni miyo kinoowoonihani yela mBibiliyani. Vano nwehe oratteene. Vaareera. Mutthu ula muulupale, nrowe niire owo—owo aari oorakama metto muloko [3.05 m], makhata owuunnuwa; aakhala ntoko mutthu tu. Ni ephome awe, vamanly’aya okhuruwa, elikanaka mwaxinama mmosa ni mukhw’awe; nyuwo pooti waatanaxa axinama; nto eyo yaahitthikela ekhalaka ephome yuulupalexa, mukhalelo w’ekumi muulupalexa, mukhalelo muulupalexa, mpakha eniwel’aya ophiwerya mukhalelo wa mutthu. Masi oluttana wookiserya va, eriyari va, woothikiliwa. Akavi ansuwela wira siensia khonwerya ophwanya nlutte

nnehaleela? Othene anyu munnisuwela eyo. Mwaha wa xeni? Ela eri va, enowa. Ola aari va, mutthu ula muulupale.

Nto xetwani onookhuruwa, vano, owo onira, “Miyo kinniwerya wuupuxerya.”

¹⁵⁸ Vano, nyuwo mwaahiyereryaka athiyana ni sowiira sa athiyana, muupuwele, nyuwo muneettihiwa ni xetwani (ni owo kahiyo mwar'inyu).

¹⁵⁹ Nwehe, vano, xetwani khikhuruwa khukela mw'enowa. Nto owo khumphwanya Hawa omatta w'oEdeni, ahiwanre etthu, nto owo khulavula mwaha wa muhokorokho eriyari. *Eriyari* enihimya “variari,” ni siiso; nyuwo munniiwa sana, vamuthukumanoni wootakaiheya. Nto owo khwira, “Vano, ti woosivela. Ti wooreera mmaithoni.” Owo iira exeni? Owo khupacerya omuurya Hawa, nto owo khukhala ni yowo, ntoko iy'awe.

¹⁶⁰ Ni owo khoona wira waari woosivela, vano owo khuruwa khaahimerya aiy'awe, masi owo iira arupanleene, ya Satana.

¹⁶¹ Nto owo khumuyara mwan'awe mwamulopwana oopacerya, yowo nsina nawe aari Kayini, mwana a Satana.

“Vano,” nyuwo munira, “eyo ti yoovonyeya.”

¹⁶² Vaareera, hiyo nnoorwa osuwela yaari yoovonyeya wala nnari. “Ni miyo kinimwiinaniha Nloko nawo ni nloko n'enowa.” Exeni? Nloko n'enowa! Owo aahikhalana Nloko, n'ule aahikhalana nloko. “Ni Owo onoonyakela muru awo, ni nyuwo munooluma nnawo Nawe.” Nto *onyakela*, vale, enihimya “Oliverya.” Vano vo t'ery'aya “epyo” anyu y'enowa.

Vano, nwehe, va anoorwa axilopwana ala anli.

¹⁶³ Vano, enowa ela, okathi yeemenly'aya vale, mutthu ula oorakama muulupale emenly'awe vale, owo aari oottheke mwaha w'oraruwa ni mwara a Adamu. Etampi eniphwanyaneya vai olelo? Exeni eniiriha itthu okhala enamuna siry'aya olelo? Vano, miyo—miyo. . . Vekeekhai nyuwo munoowerya ovara enihimy'aka. Nto eyo yaari vale.

Nto okathi iiraly'awe, Muluku khwira, khupacerya omwiihana Hawa ni Adamu.

Nto owo khwira, “Nkaawanre etthu.”

Nto Owo khwira, “T'ani yooleenleni wira khimwaawanre etthu?”

¹⁶⁴ Vano awo khupacerya, muhapo w'anatoropa, okakhelana. Khwira, “Ahe, muthiyana Nyuwo okivahaly'anyu, t'irale. Ti yowo okiwonke miyo.”

¹⁶⁵ Nto ole khwira, “Enowa t'ekivan'he masa”? Vaareera, mulaleyi, mwisaattameleke mmansinyu.

¹⁶⁶ Owo khwira, “Enowa p'ikootonthe miyo.” Nyuwo munnisuwela etthu *woototha* enihimy'aya? Enihimya

“ohonona.” Ntoko saary’awe. Xetwani khananvaheke masa. “Enowa p’ikootonthe miyo.”

Nto vo otakhaliwa khurwa.

167 Owo khwira, “Okhala wira muhiiwelela enowa waahiya aiy’anyu, nyuwo mukumin’he Ekumi mulaponi. Nto nyuwo—nyuwo munimuncererya ohaawa wanyu; nto orupala wanyu onrowa okhala wa iy’anyu,” ni sikina.

168 “Ni okhala wira nyuwo mowiiwelela amwar’inyu, okihiya Miyo (Miyo kookuminheni vatthayani; muxovo muulupalexa), munootthikela vatthayani.”

169 “Nto, enowa, okhala wira nyuwo muhiira siiso, metto sanyu sinookhuma. Munrowa weettaka n’irukulu anyu, mahiku othene eekumi anyu. Ni munrowa okhala oonyokhiwa. Ni etthaya t’enrowa okhala yolya anyu.” Nyuwo muri vo. Nlo vo nlutte nle nnihaleela.

170 Vano va onoorwa Kayini. Nrowe niwehe mikhalelo. Va onoorwa Kayini. Exeni uwo? Owo mulipa a nakoso a elavilavi. Owo onlima imatta. Mulavilavi, oosuwela; natiini, natiini vanciene; nwehe mi—nwehe mikhalelo sawe vano. Mweette ni miyo paahi minutu vakhani nrowaka.

171 Va onoorwa yowo. Owo onnisuwela wira t’olakeya. Owo onnitthuna orowa okereja. Owo onniitekela ekereja, onnivaha yoovaha awe. Onnimuruuha altari, ni sothene. Aahimuteka altari, khuhela ithutu sawe vaavo. Khuhela s’omatta... mihokorokho sa mmatta, khunvaha Muluku. Khwira, “Iyo vo, Pwiya. Miyo koosuwela wira hiyo nikhuunre masa, ti yeyo ekhumelelinhe ela.” Amosa amosa wa asulu awe arina muupuwela mmosaru yowo. Enooniherya otthu okhumaly’aya-wo. Khuruuha masa awe, a mmatta, khupweha vale, khwira, “Ela enoopaka elivelo.”

Muluku khwira, “Khayaari masa.”

172 Masi, ni muupululo wa murohoni, Abeli aahisuwela wira yaari ephome. Tivo owo aamuruunhe mwapwittipwitthi, khuthikila mmilo awe, n’uwo khukhwa.

173 Nto Muluku khwira, “Ti yeyo. Ti yeyo yiinre. Yaari ephome.” Nyuwo moosuwela ephome xeni enihimy’aka. Vaareera. “Yaari ephome yiinre.”

174 Vano nwehe. Nto vo okathi Kayini oonaly’awe wira munna awe santu-oophirikeya aahikhupaliwa ohoolo wa Muluku, ni miiriirya ni sootikiniha saaniiraneya iwe, owo khimukhalela nrima yowo. Owo khwira, “Hiyo nnoomaaliha etthu ila naanaano va.” Nkaaweheni axinna awe, nkaaweheni an’awe, annitthikela olelo. “Vano, miyo ka mulavilavi onvikana ole siry’awe,” vano owo khuviruwa. *Oviruwa* okhumme vai? Mwaaniwerya ohimya wira oviruwa...? Owo khumwiiva munn’awe. Owo aari namwiiva.

175 Mwaamuwerya omwiihana Muluku wira namwiiva? Nto Adamu aari mwana a Muluku. Bibilia ohimnye, wira, "Adamu aari mwana a Muluku," opacerya iwe wooloka ottuli wu. Adamu aari mwana a Muluku. Nto ehace ele ni nrima, ni itthu sothene, khisaaweryaneya okhuma ephome ele yooloka.

176 Yaahaana okhuma nipuro nikina. [Nipuro vahiitthu mufitani—Mol.] Nto eyo erwiye ekhumaka wa Satana, yowo aari namwiiva, opacerya wene. Bibilia ohimnye wira, "Owo aari nawoothe ni namwiiva, opacerya wene." Nto eyo eri vo. Ni owo aahimwiiva munn'awe.

177 Nto eyo yaari eyooniheryo y'okhwa wa Kristu. Nto, mwa yeyo, vekeekhai, Owo khimuvexa Sethi wira aranttele opuro awe. Okhwa, ovithiwa, n'uhihimuwa wa Kristu.

178 Nto nwehe, numala, va anoorwa atthu anyu oorakama. Nto Kayini khurwa elapo y'oNodi. Vakhala wira atithi awe yaari mutthu muuluapale oorakama, Kayini aarowa okhala ntoko exeni? Atithi awe. Ni owo aaronwe elapo y'oNodi, khimukuxa mmosa w'axirokora awe.

179 Enamuna emosa tu aawery'awe wira. Khakhanle tho axithiyana yaarowa orwa, woohikhala mwa Hawa paahi. Enihimmwa wira awo yaarinasa aana miloko mithanu ni miili axilopwana ni aaxithiyana. Vakhala—vakhala wira khayaakhanle hata athiyana. . .Bibilia khonaaromola athiyana okathi aniyariw'aya, alopwana paahi. Nto okathi, vaari wira khayaakhanle tho athiyana oohikhala Hawa, okathi okhwiy'awe, nloko n'atthu naamuhiya okhala. Owo aahaana okhalana aana axithiyana. Ni owo aahaana omuthela murokor'awe.

180 Owo aaronwe elapo y'oNodi nto khimukuxa—khimukuxa mwar'awe. Nto vamuthenly'awe iwe, ti vaavo awo yaaphwanyanse aya atthu awo oorakama aalupale, yawo yaari aana oomora a Muluku; yawo yaakhumme mwa tithi aya, xetwani, mwa Kayini. Vo ti nri nlutte nnihaleela.

181 Nto nwehe osuulu w'enowa. Vano nwehe. Muupuwele, osuulu w'enowa natiini. Nwehe owo opacerya wetta vano, minutu vakhani. Ola onrowa va, osuulu w'enowa. Exeni yaakhumelelanse? Vano mukihiye kisome paahi etthu va, miyo kilempe oxekuwa yola.

182 Exeni enoorwa munlokoni n'Abeli? Nwiriyané ela. Vaareera. Aahirwa Abeli. Numala Abeli khurwa Sethi. Numala Sethi khurwa Nowe. Numala Nowe khurwa Semi. Numala Semi khurwa Abrahamu. Numala Abrahamu khurwa Isakhi. Numala Isakhi khurwa Yakope. Numala Yakope khurwa Yuta. Numala Yuta khurwa David. Numala David khurwa Kristu, oloka voomalela.

183 Nwehe ottuli iwe moota Eroho ya Muluku yaakhal'aya mwa Abeli. Nkawehani moota Eyo yaakhal'aya mwa Sethi.

Nkawehani moota Eyo yaakhal'aya mwa Yuta. Nkawehani moota Eyo yaakhal'aya mwa David. Nkawehani Eroho emosaru yeyo yiihanaka, muhina w'osuulu ule wa xariya, erowaka. Hata wira awo yiira exeni, awo yaari ootthommwa.

¹⁸⁴ Nkanweheni Yakope, oottakatta. . . miyo nkinihimya mwa oveeha. Masi Yakope, namawoka mwaamukhaani, avarelelaka mwiila w'ekhasako y'amey'awe okathi wothene; atthyawaka nno ni nno, mwammiravo mwaamukhaani a mukhalelo w'othiyana. Iiwarin'he itthu mwa yowo, khurowa khiwoototha atithi awe, wira akuxe eparakha; masi aavahiwe yowo ohinatthi opattuxiwa olumwenku. Vekeekhai, aahivahiwa.

¹⁸⁵ Khurowa iwe khiwoototha a halo awe; khikuxa ikopo sa malepa, ikopo sa mwiri aalamo, khuhela mmaasini, wira oopopiheke imompe iye okathi saarupal'aya; wira attheeriheke imompe sa malepa, wira owo awerye omuthepya n'ukuxa imompe iye. Muluku khimureeriha mwa yeyo. Ti yeyo.

¹⁸⁶ Atakhaliwe mutthu ti mutthu onihimya etthu p'itthu mwaha wa Yakope. Nyuwo moosuwela etthu—nyuwo moosuwela etthu profeta owootha aahimaly'awe. . . Wala, owo aanihimya oratteene. Balaamu, owo ohimye wira, "Ole onrowa omureeriha onooererihiwa, ni ole onrowa omutakhaliha owo onotakhaliwa."

¹⁸⁷ "Miyo kihookuxani, nyuwo Yakope. Miyo kimuphwannye ntoko e. . . ntoko elapo y'amalapo. Nto ntoko xawawe sinttikiny'awe epuru awe, Miyo kiroomuttikinya kimukumiherya ota." Aleluya! "Kahi n'ikuru, wala n'uwerya, masi n'Iroho Aka, anihimya t'Apwiya."

¹⁸⁸ Nwehe okhuruwa iwe mpakha mureerelo ole voomalela. Eroho ele evanre muteko mpakha mureerelo voomalela mwa Kristu, eviraka mwa khula mmosa wa Axitithi, arwaaka. Khiyaacali etthu awo yiir'aya, etthu awo yaahimya'aya, etthu awo yiir'aya, awo vekeekhai yaari osuulu wa naxariya.

¹⁸⁹ Nto, va, okathi naxariya Abrahamu. . . Ovuwa! Oh, miyo vekeekhai kinoona oreera. Okathi naxariya Abrahamu okumananne awe Melikisetekhi, Yowo aari Muluku Mwanene!

¹⁹⁰ T'ani aari Melikisetekhi? "Mwene a oSalemi, yowo ori Mwene a oYerusalemu, Mwene a murettele. Owo khaarina tithi. Owo khaarina mai. Owo khatonko okhalana epacerelo ya mahiku, wala emalelo y'ekumi." Ele Owo otonko awe okhala, Owo nlelo mukumii. "Owo khatonko oyariwa. Owo khankhalakhala akhwaaka. Owo khatonko okhalana tithi wala mai. Owo khatonko okhalana epecerelo ya mahiku, wala emalelo y'ekumi." Mukileele aari Pani. Muluku Ohinimala; mwa yeyo hiyo nnimwiihan'ahu e. . .

¹⁹¹ Oh, miyo kooliyala pahi etthu nyuwo muniihan'anyu vano. Teofania, ti yeyo. Ntoko paahi mu. . . Kahi ehantisi; masi nlelo eyo etthu yowooniheriwa. Ntoko Owo saaruly'awe wa Abrahamu

mmuxaaxani osulu iwe, ntoko nlaikha, khuhimya, khimuleela Sara wira owo aarootheya, ottuli Wawe, ni sikina. Ethhu, ethhu emosaru.

¹⁹² Nto Owo aari va. Owo aakumanne ni Melikisetekhi. Nto pwa-. . .pwaapu Abrahamu, mwa osuulu wa naxariya, aahimuliva sanamuloko Melikisetekhi; ni eyo aalikeliwe mwaamusulu awe va, osuulu wa naxariya.

¹⁹³ Vano va onoorwa osuulu w'e—w'enowa. Vano, muupuwele, onookhala owanani, ekhotto eriyari wa yawo.

¹⁹⁴ Osuulu w'enowa onimoorwa, nto onikhumiherya exeni? Vano nrowe nikuxe iyakha vakhani soopacerya. Vano nwehe ethhu eniiraneya vale. Hiyo nnoosoma eyo naanaanoru, 'okhala wira miyo koowehaweha. Epyo y'enowa yaamuyanre Kayini. Kayini khurwa elapo y'oNodi, khwaayara atthu oorakama, nto awo khurwa elapo ya Nowe.

¹⁹⁵ Awo yaari atthu alavilavi, oosuwela, oosoma. Eyo ekeekhaii? Awo yaari anamateka, oopuni, masientista; kahi muhina w'osuulu wa naxariya, masi muhina w'osuulu wa Satana, enowa. Awo yaari atthu siiso ntoko—ntoko masientista, ni anamateka, ni alopwana aalupale, anamasomiha. Solempwa sinihimya siiso. Awo yaanirumeela epronse. Awo yaanirumeela eyuuma. Awo yaanirumeela iyuuma. Awo yaanipaka itthu. Awo yaanitakanxa iyuuma soovirikana, n'uteka mampa, ni sikina. Solempwa sinihimya siiso. Ni awo yaari anamanyemula a Osuulu wa muthiyana, Nowe, naxariya. Eyo ekeekhaii? [Muthukumano onira, "Amen."—Mol.]

¹⁹⁶ Nrowe naattharathare vakhani. Nto, awo yaahikela mukalawani, itthu sothene khuhononiwa. Yaaroophiyererya watta w'etampi, nto awo kuhoolela, ni oolavilavi ni oosuwela. Mpakha, Muluku oweha vathi, khayaakhanle anci-ene yaahanle, tivo Owo khumukuxa Nowe paahi ni amusi awe mukalawani, nto khurupa epula khuhonona ethhu yothene. Khumuveliha Henokhi, toko. Eyo ekeekhaii? [Muthukumano onira, "Amen."—Mol.] Yaahikhala epyo yothene, yaahala okhala epyo yothene; masi Owo yookhala enthun'awe ehaana omaliheriwa.

¹⁹⁷ Vano, Nowe n'ana awe, yawo yaakhumme, Khami, Semi, ni Yafete, yaakhumme mwa mpantte wa xariya.

¹⁹⁸ Moota xeni epyo yaakhalakhanly'aya ephovaka? Epyo yaahiphovela mukalawani, vekeekhai ntoko yiiraly'aya wopaceryani, mwa muthiyana, axaara aya. Awo yaahikuxa epyo ya Satana, mukalawani, vekeekhai ntoko Hawa aakunx'awe epyo ya Satana, wira amuyare Kayini, mwa muthiyana.

¹⁹⁹ Nyuwo munaahela athiyana awo muplataforma mwanyu waakhaliha alaleyi, Bibilia akhoottihaka! Paulo ohimnye wira, "Akhala mutthu onuupuwela wira profeta, wala a eroho, asuwele wira itthu silempy'aka ti sooruma s'Apwiya; nave akhala mutthu oohisuwela, owo ahisuweleke."

200 Tivo miyo kikhumme aka okereja Patista va. Munna Fleeman aari vaava okathi ovinre; miyo kinoona wira owo aari weiwe ohiy'ule. Totori Davis khwira, "Nyuwo nvenye va mwaakhalihe axithiyana ala alaleyi."

Miyo khwira, "Miyo nkiniira eyo. Nnari, nnakhala."

Owo khwira, "Ahe, miyo kinooomolani."

201 Miyo khwira, "Miyo kootoko woomoliwa mwa ele yooreera." Miyo khwira, "Ala Masu a Muluku, ni Awo annikhoottiha etthu iyo. Ni miyo nkinwerya okhaliherya ele Muluku onikhottih'awe." Nnari, mulopwana.

202 Mutthu ti mutthu oniira eyo, enooniherya wira awo awiixuttihi oowoottha, maprofeta oowoottha. Bibilia ohimnye wira awo yaamukhala. "Owoototha ale oothanliwa vaari wira vaaniweryaneya." Eyo eri vo.

203 Nwiriyane ela vano. Vano weiwe, nto, khurwa Khami, Khami ni mwar'awe, n'akina. Owo aahikhalana otakhaliwa mwa yowo. Mwa Khami okhumme Nimurodi, yowo aamutenke Papiloniya. Mwa Papiloniya ekhumme ekereja Katolika, epecerelo aya. Khurwa eviraka mwa Akhabi. Khurwa ekhumaka mwa Akhabi, mpakha Yuta Iskariyoti; khumalela, nwanani a Kristu.

204 Nto mahiku ala ookiserya, va eniphwanyaneya eroho ele ya nwanani a Kristu ni Eroho ya Kristu. Eroho ya nwanani a Kristu, yiiraka, "Mahiku a miiriirya aamala." Eroho ya Kristu, yiiraka, "Owo mmosaru nsana, olelo, ni mahiku othene." Eroho ya nwanani a Kristu enira, "Khenivirikana nyuwo mwaapatisiwe ene ni 'Tithi, Mwana, Eroho Yowarya,' oyeheeriwa, omiseriwa, etthu p'itthu, enihimya etthu emosaru." Bibilia ohimnye wira Muluku t'ohivonya, ni Owo khanrukunuwa. T'ani onrow'anyu omurumeela? Eyo ti yawinyu.

205 Vano nyuwo munira, "Enniweryaneya awo okhala vamosa? Nyuwo muhimnye, wira, mukalawani mme, Munna Branham, yaahikhala mme owanli Khami ni Sethi." Ti yeyo, vekeekhai ekhweli. Khami aari mutakhali. Sethi aari natiini ni naxariya. Vaareera.

206 Nrowe nimutthare Khami. Vaareera, vano, ookhala Khami ni Sethi ekalawa emosaru; mmosa naxariya, ni mukina oohikhala naxariya. Aahikhala nakhuku ni epompa ekalawa emosaru. Aahikhala Yuta ni Yesu ekereja emosaru. Aahikhala nwanani a Kristu ni Eroho Yowarya ekereja emosaru.

207 Ni, olelo, iroho seiyo sinnivara muteko. "Yooneyaka ntoko oothunku, anatiini vanci-ene, masi yooneyaka ntoko oothunku nave akhoottaka Owerya waya; awo muheettaneke." Eroho Yowarya, ehimyaka, "Yesu Kristu mmosaru nsana, olelo, ni mahiku othene." Epantte xeni enrowa'anyu othanla?

208 Nwanani a Kristu onira wira *Ela* eliiuvuru ya eyaminelo paahi. "Hiyo ninrowa otthikela ohimya Wamini wa Arummwa."

Miyo kimmuthhuna khula mulaleyi akileele vatthu Wamini wa Arummwa oniphwanyaney'aya mBibiliani: "Miyo kinimwaamini Muluku, Tithi Oowerya sothene, Mpattuxa wirimu n'ilapo ya vathi; Yesu Kristu, Mwana Awe. Miyo kinnaamini Ekereja Katolika Yowarya y'oRoma, waataana wa masantu." Muniphwanya vai iyo mBibiliani? Ni enamwi mutthikelaka yeyo mukereja mw'anyu suulupale Metotista ni Patista. Owo mwiixuttiho wa xetwani, ni maprofeta oowootha aniixuttiha yowo.

²⁰⁹ Nto miyo kinroromela wira nkiniwiinihami murima, masi miyo kinihimeerya etapernakulu ila. Nyuwo va oTapernakulu Branham, mwisiinanele n'itthu iyo. Etthu p'itthu enaamini waataana wa masantu enkhala olapela minepa. "Ori mulapeleli mmosa paahi eriyari ya Muluku n'atthu, nto owo ti Mutthu Yesu Kristu." Khenikicala aMaria akavi aniphwanyaneya!

²¹⁰ Munnona moota osuulu ule wa muthiyana ottuli wu wiiraly'aya? Munnona moota epyo ya muthiyana yaaphovaly'aya iwe?

²¹¹ Nkawehani olelo, wAmerika. Amerika osuulu wa xetwani. Exeni iyo? Eyo elapo ya muthiyana. Nyuwo munniiwaka, "Ola olumwenku wa muthiyana." Ti yeyo. Ela elapo ya muthiyana. Awo t'anihela ettharihelo.

²¹² Miyo kaaroorowa va, kahi khalai, oSuisa. Axithiyana yiiraka. . . Muthiyana mmosa, a Eroho Yowarya khwira, "Nyuwo moosuwela, miyo karowaru wAmerika, enihimmwa wira axithiyana t'otaphuwa."

²¹³ Miyo khwira, "Mukihiye kooleelani etthu eneettiheriw'aya." Miyo kipacerya omuleela.

Owo khwira, "Oh, ikharari, nkinthhuna hat'etthu ntoko eyo."

Miyo khwira, "Ti weiwo eneettiheriy'aya-wo."

Nyuwo moosuwela, awo khaniira itthu iwe ntoko aniira'aya nno.

²¹⁴ Exeni iyo? Mukihiye kiwooniheni wira Amerika muthiyana. Vamusurukhuni vahu eri-vo elatarato ya muthiyana. Itthu sothene nno muthiyana.

²¹⁵ Mukileele, khokhanle mthukumano w'alipa-oowaapeya eviinyu wiiphiini mulaponi, yaarowa okhalana. . . Muhele mithukumano miloko mixexe s'alipa-oowaapeya eviinyu wiiphiini mmuttettheni mu, ni mwaahela anamittompe araru athiyana, ooreera sana aniittikinya yeetaka mphironi; awo anooroiha minepa soowaatta mokhwani, waakhalela ethaama, ovikana mithukumano sothene s'alipa-oowaapeya eviinyu wiiphiini mwaarow'anyu ohela mpoma. Eyo vekeekhai ekhweeli.

²¹⁶ T'ani uwo nto? Ti muthiyana. Owo exeni? Owo muluku a wAmerika.

217 Mwaakuxe amosa amosa w'aratti ala a isineema; awo anoovenya va n'utheliwa imara xexe wala thanu, akhalaka n'axilopwana araru wala axexe oovirikana okathi mmosaru; ni irevista iya kamosa kamosa yaakumiheryaka ni waahimeerya, akumihaka ilatarato saya ahiwanre etthu va. Ni nyuwo axiruusi munthara eyo ntoko ethoonyeryo anyu, (mwaha wa xeni?) okhala wira amai inyu muhinatthi nyuwo, khino, apiipi anyu muhinatthi nyuwo. Nyuwo munnona vatthu epyo eyo y'enowa enikel'aya-mo? Vekeekhai, ti yeyo.

218 Nto exeni yiiriwe? Vaari wira sootakhala sihaana othotola maloko muloko ni maxexe, nittharihaka ikano, enrowa okhala exeni sootakhala sathotoliwaru nihiku nla, okathi osuulu wa naxariya ohalenly'aya omalihiwa? Ni Muluku ohimmye wira waamoorwa okathi, Owo ahaavukunle muteko, khiyaarowa ohala hat'etthu. Hiyo nri okathi wookiserya. Mwaaxaye anaxariya ohiy'ula; murowe mmuttettheni!

219 Oh, nyuwo munimwaaphwanya atthu anira mpantta w'ekereja oororomeleya wa aPatista ni maPrespiteriyanu, ni akina, vaniweryaney'aya okhala. Masi awo kharina nata ni Muluku onvikana namarokolo sirin'awe owara ixapattho sa nakhutu. Khansuwela hat'etthu ya Yawo! Sothene ansuwel'aya: "Nyuwo mwa muKristu?"

"Miyo ka muKatolika."

"Nyuwo mwa muKristu?"

"Miyo ka muPatista."

"Nyuwo mwa muKristu?"

"Miyo ka muPrespiteriyano."

"Nyuwo mwa muKristu?"

"Miyo ka muPentekosite." Eyo khena nata n'Iyo.

220 Nyuwo mwa muKristu okhala wira Muluku, ni mahala Awe, onniwoopolani. Ni nyuwo munnisuwela Yeyo. Ni etthu emosa yoorukunxa makhalelo anyu, wira nyuwo munikhala voovirikana. Nto nyuwo mwa mutthu musya ni yoopattuxiwa mwa Kristu Yesu. Vekeekhai.

221 Masi nyuwo munnona vatthu vari epyo y'enowa? Exeni yaari epyo y'enowa? Oraruwa. Munnitthara? Oraruwa ni Hawa. Exeni yiiranen'ye ni yeyo? Exeni eyo yaakumiheny'aya? Eyo exeni ohiy'ula?

222 Nkawehani ottuli wu, iyakha vakhani sivinre, okathi esipo yoopacerya ekhumaly'aya. Nyuwo atthu atokwene, okathi e. . . Isipo saanuulumeliwa sihinatthi ohiwa wiipiwa muraatiyuni. Nto yoopacerya yaakhumme, yaari ile, "Mwaapirikixe, axiruusi ale, mwaapirikixe, moonihaka makutha anyu ooreera," ni sothene siiso. "Mwaatheye atithi n'amai, ni mwaavahe othene 'ha-ha-ha!'" Eyo ti yoopacerya yaahiwe othereneya. Nyuwo

munuupuwela wira ori vai ohiy'ula mmiravo aalempe esipo ele? Owo ohookhwa.

223 Munimuupuwelela exeni Clara Bow, yowo aapacenrye okhumelela khwira, *Ikhootwa Soowoopiha*, ni namarula ikuwo oroihale minepa ikonto sene mokhwani? Nyuwo munuupuwela wira owo ori vai ohiy'ula? Owo t'okhwa ene okhuma khalai. Owo ori vai, n'irutthu awe ele? Erupathele nipuro nno, yoothumpwa mutthayani, ni miyunku n'axikokho sookhuura. Nto munep'awe ori nipuro nlo ohoolo wa Muluku a exariya.

224 Ori vai mulopwan'ole aamukunxe muthiyani'ole khumpakela ikuwo iye soonanara siniwariwa, ni waarula othene aya epantte emosa ni ekina, ni ohaakhala sana? Khiriwa, "Awo anipakela exeni seiyo? Muniwarelani itthu ntoko iye?" Okhala wira mutthuna wira alopwana yoowehekeni, ni khiyavo enamuna ekina yo wooniherya.

225 Nto nyuwo munnisuwela wira mwiiraka siiso, ni natampi mmosa onoowehani, nyuwo moosuwela etthu yiiranen'ye? Opwaro wo Olamuliwa... Nyuwo munira, "Munna Branham, miyo koororomeleya n'aiyaka sinweryaka okhala." Nyuwo munookhalihwi oottheke mwaha wo oraruwa. Yesu ohimnye wira, "Ole onimuweha muthiyana amuwereihaka murima oomala oraruwana vamurimani vawe." Mulopwana owo akhala oowaakhula mwaha w'oraruwa, t'ani onrowa okhala ole opance? Moota nyuwo mwaawanry'anyu ni mwiisooniheny'anyu.

226 Vano, miyo nkinihimya wira nyuwo muhaana owara ntoko etthu ekina ota wa ekaaxa ya khalai. Masi, nyuwo pooti wooneyaxa ntoko muhano.

227 Ni munookhuma va n'urula ekuwo, akaputtula anyu ookhuveyaxa, n'uwara musako mwaamukhaani *siiso*, ni mwan'inyu ni maitho awe ntoko ethaalu ya sikaro, ni sikaro mwano mwanyu, mweettaka muramphani. Nyuwo khamuniirela eyo etthu yooreera. Nyuwo pooti ohittheke wa mah'owo, masi xetwani onoovarelani muteko ntoko ekaruma vekeekhai ntoko saamwiirin'he awe Hawa.

228 Ekhalenleni elapo ya muthiyana? Okhala wira eyo eneettiherya eroihaka m'orummwani ni Katolisisimu. Exeni ila olelo? Nyuwo khamuniwiiwa awo omuromola Yesu. "Mutteliwe Maria! Maria, mai a Muluku! Cecilia Owaarya!" Khula enamuna ya masantu, masantu akhwiiye. Va woohikhala khalai, ohitto o... .

229 Miyo kaari oMexico, mwaisana. Va onoorwa muthiyana mmosa oohaawa, aipurulaka. Makutha awe, ni othene ahapaliwe ene siiso, nto khwiipitha; anlaka, ni avarelaka matata awe. Nto tithi eettaka, aakunxe ene anamwane anli axikhaani, awo yinlasaka; mai ahaawaka siiso; 'mwaha wo wira muthiyana mmosa, awo animwiihan'aya oowaarya, orimookhwa. Awo yaahikhalana eththontto awe osulu iwe vamwako. Namaphenta

mmosa oroomwiiva. Nto naanaanoru owo vanimal'awe wiiviwa siisaale, vekeekhai, owo onikhala santu; owo aari muKatolika. Vano owo aamurowa, wira arukunuxe murima; nto owo aahaana wiipurula imilya piili [3 km], vasulu va maluku oovilikeya, wira arukunuxe murima.

²³⁰ Munna, yaakhanle ene etthu emosa kirin'aka wira, Yesu Kristu okhwiye mahala. Mahala, miyo kiihoopowa; ni kahi mwa—mwa mmansaka, masi n'utthuna wa Muluku, ni mwa oreera murima wa Muluku.

²³¹ Nto alipa oolavula khukikoha, khwira, "Mwenye Branham..." Mwa—mwana mwaamukhaani aakhwiye aahivahiwa ekumi, ni itthu vakhani vaavale. aKatolika ikonto miloko miraru... Nnari, mukilevelele. Yaari ikonto miloko miili. Ikonto miloko miraru waari wAfrika. aKatolika ikonto miloko miili khimwaakhela Kristu ntoko Moopoli aya, emara emosa, vairen'ye aya yeyo, keemenleene Epoma y'oMexico. Nto anamukuttho ale, khayaawerya ohimya hat'etthu; oowaatta, khupacerya evitikavitika. Yaahikhala oowaatta muxerexere. Vano owo khwira, "Mwenye Branham, nyuwo munnaamini wira masantu ahu anniwerya wira etthu emosaru nyuwo eniir'anyu?"

²³² Kisuwelaka mwiiixuttiho aya, miyo khwira, "Vekeekhai, vakhalaru wira awo akumii." Munnona? Vano, khivanweryaneyya okhala santu muKatolika mpakha mukhwiye, nyuwo moosuwela.

Vano owo khwira, "Oh, khamunwerya okhala santu muhikhwiye."

²³³ Miyo khwira, "Nyuwo musomme vai yeyo? Paulo ohimye wira, 'Masantu ari oEfesu,' n'ale ari owiihaniwa ni Muluku. 'Masantu ari oEfesu,' owo aasoma epaphelo awe; ni masantu ari mapuro makina, oKalasia, ni—ni 'masantu oRoma,' ni akina. *Masantu*, 'ale ooreerihwa.' Ankhi yeyo?"

²³⁴ Owo khwira, "Vekeekhai, vano, hiyo khaniri wira nivaanyihane ni Bibilia. Okhala wira, hiyo na ekereja, ni etthu ekereja enihima'aya. Hiyo khennicala ele Bibilia enihim'y'awe. T'ile ekereja ehimaly'aya." Khwira, "Nto muupuwelo anyu t'uvi mwaha wa ekereja Katolika?"

²³⁵ Miyo khwira, "Miyo kaanithuna muhikikonhe yeyo. 'Okhala wira mookikoha, nto miyo kinrowa wooleelani Ekeekhai."

Khwira, "Ahe, kintthuna nyuwo mukileele Ekeekhai."

Miyo khwira, "Enamuna yootepaxa y'olapela minepa miyo ensuwel'aka."

Owo khwira, "Nyuwo munsuwela sai yeyo?"

²³⁶ Miyo khwira, "Etthu p'itthu enlapela n'alipa-okhwa enikhala olapela minepa." Miyo khwira, "Vaari wira santu ule onnilavula aakhulaka, nto owo ori omooroni. Okhala wira, ale atumphe ephiro, bi—Bibilia aka ohimye wira khivaaweryaneyya

ohokolowa.” Ti yeyo. Nto miyo khwira, “Yaari yeyo, vaari wira owo aari santu, owo xetwani onlavula ntoko santu, ni owo khahiyo santu, nnakhala.”

²³⁷ Nto owo khwira, “Ahe, vano, minutu mmosa paahi.” Khwira, “Nyuwo munnilapela n'alipa-okhwa, nave.”

Miyo khwira, “Vai?”

Owo khwira, “Yesu Kristu ohookhwa.”

²³⁸ Miyo khwira, “Masi Owo oohihimuwa-tho. Owo kahi ookhwa. Masi Owo mukumii, wira alapele, nto mulapeleli mmosa paahi eriyari ya Muluku n'atthu.”

²³⁹ “Miyo ti Ole aakhwiye, nto ori mukumi tho, ni onkhala mahiku othene. Miyo kookhalana ihulelo sa mokhwani ni omooroni.” “Ole ontthuna, arwe awurye mahala maasi a Ekumi.” Wulu! Owo ti Muluku ahu. Owo ti Muluku ahu.

²⁴⁰ Nto osuulu wa naxariya ohanle okhuma. Mwaaleele atthu itthu iya. Mwaaleele atthu otthikela ephiro ya Bibilia. Mwaaleele atthu mwaha wa miiriirya. Mwaaleele atthu yeyo. “Ekereja aya khenaamini Iyo,” tivo awo aana oophwanyiwa, wa Muluku. Bibilia ohimnye wira hiyo naahiweryeke ovilela olupatthiwa, ni weererwa, n'unyemuliwa, ni wiianiwa “masantu-oophirikeya” ni sikina, siiso, nyuwo mwaahiweryeke ovilela eyo, nyuwo mw'ana ophwanyiwa, ni kahi aana a Muluku. Bibilia ohimnye siiso.

²⁴¹ Mukiihane “santu-oophirikeya,” mwatthuna vale. Mukiihane etthu p'itthu nyuwo entthun'anyu. Vakhalaru wira murima aka ori sana ni Muluku, ni musuwelelo aka onnilikana ni Bibilia a Muluku, miyo kineetta kirowaka ephiro yela wenno. Ayo, mulopwana. Eyo t'ile hiyo enaamini ahu. Eyo ti Ekereja ya Muluku mukumi, ehinrwa ni teologia. Eyo khenirwa ni muupuwelo w'osoma, woopakiwa ni mutthu. Eyo enirwa vekeekhai ni Ekeekhai yowuupululiwa wira Yesu Kristu Mwana a Muluku.

²⁴² Vaari wira miyo kaarina muupuwelo w'osoma paahi, okhala wira ekereja Patista wala Metotista yookixuttiha itthu *elaxeni-elexe*, kaamwiiwaka Bibilia ola, vaari wira Bibilia... Khaapatisiweru ni nsina “n'Atithi, Mwana, ni Eroho Yowarya,” nave khumusoma Bibilia ola, ni mulaleyi khukileela wira khaavo mBibiliani aatonko opatisiwa woohikhala ni Nsina na Yesu Kristu, n'umusoma ni wona wira eyo yaari Ekeekhai, kaamurowa mmaasini vowaakuvaxa vaarow'aka owerya. Ayo, mulopwana.

²⁴³ Vaari wira mutthu aamukileela wira—wira Yesu Kristu aari mpenuxa muulupale, ni ekereja aka okileela wira, “Mahiku a miiriirya aamala,” ni kitthunaka ovonihiwa, miyo kaamutthyawa vowaakuvaxa vaarow'aka owerya, mpakha waltari iwe, wira kivonihiwe. Vekeekhai kaamwiira.

²⁴⁴ Vaari wira ka mulaleyi, nave khukhalana mu—muthiyana mulaleyi vapulpitu vaka, n'usoma mBibiliyani khoona wira muthiyana khandthunihiwa okhala mulaleyi, miyo kaamurora omukumiha vo, vakhala wira yaamupera esapala ottuli waka.

²⁴⁵ Nto muupuwele, akilanthi ene ottuli vatthu Munna Wright vary'awe, ohiyu omosa, muthiyana mmosa aarowa okisukhumela vamukhora mwaha wo wira etthu ntoko yeyo. Ayo, mulopwana. Miyo khwira, "Nyuwu khamunoorwa mukereja mwaka ni yawinyu. . ." Okathi awo yaawarak'aya, wala othikila ivestiitu saya vathi siisa sa, n'itthu iye soonanara wona, nto nusu n'erutthu aya yoophiyeryaka wooneya. Miyo khwira, "Yeererye orwa mukereja mwaka, vekeekhai kinoowoomola." Ni snickle-fritz mmosa va, owo okhwiye voohipisa numala yeyo; nto owo aahikiihana, akhwaaka. Owo aari mwali muKatolika, aavinre vale khukilaathi ni yeyo siiso. Miyo kiweha ottuli kimuthurumela, akilaathiki va, nto awo yaamwiipasa. Kirula ekhasako aka, kitthikela weiwe, kimpweherya mmakhatani mwawe. Miyo khwira, "Muhano, mwaarowaka okiwa miyo kilaleyaka, xontte mwaanitthuna owara ekhasako ela muryeene mukeraja mwa Muluku." Munnona? Vekeekhai.

²⁴⁶ Owo khunyohola anyakelaka vathi vale, ni khutthukula iyano iye sikhaani. Khukhumela ota w'empa. Owo khwira, "Vaari wira awo aakhalana etiini, miyo nkaarowa ohiya emompe aka okhalana enamuna ele y'etiini."

 Miyo khwira, "Muhiivelavelihe, khenrowa okhalana."

²⁴⁷ Nto hiyo khukhalana muthukumano wa muheemani, atthu khukiihana okathi owo waakhwa'awe. Waamuphwanye owereiya murima, nto aamookhwa. Aiy'awe khurwa. Awo, "Munniwerya, murwe mwaakuve!" Nto miyo kaari vamuthukumanoni vaavo. Mmiravo mmosa, muulupale oorakama, eemenleene vamukhora, akilipelelaka. Nto miyo kitthimaka ntoko. . .

²⁴⁸ Kiwela mukaaroni mwaka kitthimakela weiwe. Okathi oronw'aka, kimpchwanya n'furmero ole vale, yowo onkhala ohitto oHoward Park, nlelo. Owo khwira, "Reverendu, khivantthuneya orwa." Soovira iyakha soophiyaka miloko miili, khino soovikana vakhani. Khwira, "Ohookhwa." Khwira, "Owo ohookhwa soovira minutu miraru." Khwira, "Owo aamukhuwela vancipale ntoko saawery'awe, awunlelakani." Khwira, "Miyo kookhalana muhupi anyu."

 Khwira, "Exeni?"

²⁴⁹ Khwira, "Mmuleele mulaleyi ule, yole kimuhimanne aka yele, 'Xontte akilevelele.'"

²⁵⁰ Miyo kirowa iwe wira kanwehe yowo. Muthiyana ooreera; ni owo khaareere ohaawa. Owo aarina miyuuka sikhaani vaphulani wawe; muthiyana mmosa oophwaneliwa. Nto miyuuka, saakhala

ntoko, saamutepa. Ni maitho awe yaahikhuma mphakani mwaya mara, ni yaahirukunuwela ottuli vakhani. Vekeekhai, nto marupo awe ni isyo sawe saaheetta, nto nikupetthe nikhumaka voolilini vothene, siiso.

²⁵¹ Nto aiy'awe khukiweha, khwira, "Munna Branham, muvekele nivekelo, 'okhala wira owo aatthuna owoonani."

Miyo khwira, "Onvekelela owo vano khinaarowa ovara hat'etthu."

²⁵² "Epantte ele mwiri onuuramel'aya, eyo ti epantte onimorel'aya." Munnona? "Muhootothiwe; Muluku khanveehiwa. Ele mutthu enaal'awe, yeeyo t'inheph'awe."

²⁵³ Nyuwo munnona vary'aya-vo? Vano exeni ekhumelenle? Nkanweheni muthiyana aarowa wira siiso. Nkaaweheni athiyana ale yaakhala mahiku ale khalai, mwaarusi a munikhruni n'owiipa, mwan'awe aari exeni? Namweettasa pure. Mwana a namweettasa pure ti pani? Mwaaruusi a rock-and-roll. Mwan'awe onrowa okhala exeni? Hum! Exeni iyo?

Munnona osuulu wa naxariya?

²⁵⁴ Nkaiweheni nyuwo aPatista. Mutthikele ottuli khalai vakhani. Mmutthikele John Smith, mulipa-oopacerya anyu, nyuwo aPatista. Okathi, owo aavekenly'awe mwaha wa sootheka s'atthu, mpakha, owo wunla ni waavekelela atthu mpakha maitho awe owipelana otthukana, ni amwaar'awe yaahaana omulyiha vameesa, yolya awe ya vaasiisu.

²⁵⁵ Ni nyuwo aMetotista, muri va, ni mania vaphulani vanyu ni mmaaruni mwanyu, nto munikhala ntoko ikhukulu sa vakhavaloni ya xetwani; ni mukhumaka, mwaawanreene akaputtula, n'itthu siiso! Okathi, mutokwene John Smith, mmosa wa makhulupale a ekereja Metotista, ahinatthi okhwa arineene iyakha miloko mithanu na miraru ni thanu, aahilaleya mutthaka mmosa woohipisa iyakha xexe, kiireke, iwora xexe. Atthu yaahaana omukuxa n'umuhela vapulpitu. Nto ala yaari moolumo awe ookiserya. Owo iirale, "Miyo nkireere otikinihiwa ni mwiirelo wa ekereja Metotista." Khwira, "Hata aana axithiyana a okereja Metotista aniwara ipeetthe sa wero mukathani mwaya." Owo aarowa ohimya exeni vano, yaawanreene akaputtula, yiipaka munikhuruni n'owiipa?

²⁵⁶ Nyuwo mweettaka sana. Exeni yiiranan'ye? Nyuwo muniira ntoko amai inyu. Vekeekhai ti yeyo.

²⁵⁷ Tivo hiyo ohinthun'ahu hata mmosa wa miromolelo iya opharelela yela, va, yoolupanyiwa va: "Hiyo n'aMetotista. Hiyo n'aPatista." Hiyo na aKristu paahi. Muhiye etthu iyo siiso, mutaphuwe.

²⁵⁸ Vano, munnona osuulu w'enowa? Exeni muthiyana ntoko ole aarow'awe okhwa? Eyo yaarowa wira exeni? Exeni? Awo yaahikhala arowaka, arwaaka. Awo ahaattikiha aPatista,

ahaattikiha aMetotista, ahaattikiha aPrespiteriyano. Awo yiinre exeni? Awo othene arootthikasa, ntoko mai aya, namararuwa a khalai. Awo othene ari vo, yiiraka oraruwa omosaru. “Ahe, khivanvirikana hata vakhani. Awo annipwinihiwa. Awo anoomiseriwa. Awo, awo anoorwa, n’ulapa. Awo ankuxa miyeri saya mithanu na mosa sa mwikho; awo khayaawurya vanci-ene okathi ene yowo, ni sikina. Awo ahaakhaliha athu ooloka. Awo anniliva oratteene mu. . .” Oh, wulu! Eyo khena nata ni yoophwanyiha ya Eroho.

²⁵⁹ Soophwanyiha sa Eroho t’iya “wamini,” wamini wira Yesu Kristu mmosaru nsana, olelo, ni mahiku othene; “ophentana” wa axinna; “opuha, murettele, ovilela, oreera murima, othunku, ovilela, wisuumaaliha, ohiviruwa pure.” Iyo t’itthu, soophwanyiha sa Eroho.

²⁶⁰ Nto hiyo nimmukuxa mutthu, “Ahe, owo—owo onikhala makhalelo ooreera wa namwaattamanani awe.” Siiso aaniira Esawu.

²⁶¹ Esawu khaatonko omutthekela mutthu, nave Esawu aari a xetwani; masi Yakope, aakhumme erukulu emosaru, aari a Muluku. Osuulu wa xetwani; Osuulu wa muthiyana, Epyo ya Muluku yaahikhuma.

²⁶² Vano, nyuwo moone, yothene eyo eniphiererya mw’ela, enihieriwani mulaponi olelo? Miyo kinrowa ohimya ela voolipavo, okhomakela yela, nto nnoorowa opacerya muhakalaliho numala yela, muthukumano ontharelana. Eyo yoophiererya mukhalelo mmosa. Nto, xontte, miyo nkinihimya vooveeha. Miyo nkinihimya ela wira kikhale ootakhala murima. Yoophiererya nipuro, nikhuru nuulupale, n’anatiini oohiphwanela, aana oophanyiswa. Va t’iri miyoonelo saka sookiserya. Vekeekhai ti vaavo vaphierererya. Nyuwo moosuwela wira eyo ekeekhai. Yoophiererya ekhanly’aya wiitakaniha mukereja ni wira mpantta w’ekereja, “Yooneyaka ntoko oothunku, akhoottaka Owerya waya nave,” mpakha ophiererya okhala nikhuru n’aana, anatiini oophwanyiha. Vekeekhai ti yeyo ery’aya.

²⁶³ Exeni ehanle ohoolo? Yookhala epholovololo ethomeiwe nipuro nno, sinci-ene seiyo, misika sa kopalto ni itthu sothene sikina. Iyo sinwehererya okathi yowo ophiya paahi. Nto onookhala ohononiwa ni moro, ntoko waakhanly’aya ni maasi.

²⁶⁴ Nto, apathani, khula etthu muniir’anyu, mwaari muKristu ni mwakhalanne ene Muluku mmurimani mwanyu, ni moosuwela wira moovira mokhwani murwaka mw’Ekumini, nyuwo mwahaana okhala mutthu oohakalalaxa mulaponi mothene.

²⁶⁵ Okathi Eroho Yowarya mwa nyuwo. . .Bibilia iiraka, “Yesu Kristu mmosaru nsana, olelo, ni mahiku othene”: miromolelo sinira, “Masi hiyo ninnaamini wira miiriirya soomala”; Eroho

Yowarya enira, “Amen, Yesu Kristu mmosaru nsana, ni mahiku othene. Ekhale siiso.”

266 Vaari wira Bibilia ohimye wira, “Murukunuxe murima, mupatisiwe khula mmosa a nyuwo ni Nsina na Yesu Kristu wira muleveleliwe itampi, munimwaakhela Eroho Yowarya. Okhala wira natiri t’awinyu, ni an’inyu, awaya Amalapo, othene ale ankhala ottaiwene, othene ale Apwiya Muluku ahu. . .” (Othene ale Apwiya Muluku ahu anthhun’aya owiihana, moone, kahi othene ale aMetotista aniwiihan’aya, aPatista aniwiihan’aya, masi othene ale Apwiya Muluku ahu anthhun’aya owiihana, animwaakhela Eroho Yowarya ela, n’upatisiwa ni Nsina na Yesu Kristu, yeyo Bibilia ohimaly’awe): eyo yoomananru, nyuwo munira, “Amen!”

267 Ekereja ehimye wira, “Oh, eyo khenvirikana hata vakhani.”

268 Masi Eroho Yowarya ela mwa nyuwo enrowa wira “amen” wa Masu Awe.

269 “Mutthu khanikhala mukumi ni yolya paahi, masi Masu anikhuma mwano mwa Muluku.” Eyo vo.

270 Miyo kintthuna nyuwo mukoonihe Yolempwa emosa vatthu etonko aya wira masa t’apacenrye etthu eyo enrowa vano. Miyo kintthuna nyuwo mukoonihe wira awo yaakhuuranse masa. Miyo koowoonihani vatthu Kayini uupuwenly’awe etthu emosaru, ni vatthu osuulu awe onuupuwel’aya etthu emosaru.

271 Masi muupululo wa murohoni wa Muluku onnooniherya, ni Bibilia, wira waari okumana w’ekhapa wa mulopwana ni muthiyana, woohiphwanela. Ti vaavo atthu anyu oorakama ni aalupale anikhum’aya-vo. Ti vaavo etampi anyu onikhum’aya-vo. Ti vaavo ohononeya wanyu onikhum’aya-vo. Ti vaavo eyo emoreny’aya-vo.

272 Vano nwehe mwa sothene iya—iya, nkawehani, e—enowa yaari mulavilavi vanli. Osuulu aya okathi wothene onikhala w’olavilavi vanli. Nto miyo kaanithuna kiwenleene vapulpitu va kivaraxaxe mikrofone ula mmatatani mwaka, n’uphareeliha inawo saka vapulpitu, n’uhimya ela. Nto, olelo, ari vai asomi anyu aalupale? Pastore anyu oronwe n’ukhalana osuwela w’osoma vanci-ene, nto owo onoovenya; owo ti pastore a ikereja suulupalexa siri mulaponi, ni sikina ntoko seiyo. Osuulu w’enowa onlipa vai? Mapuro oolavilavi ni oosuwela ntoko yawo; asomi alavilavi, oocencera. Ti vaavo owo vary’awe. Ti vaavo owo onlip’awe-vo.

273 “Kahi n’ikuru, kahi n’uwerya, masi ni Eroho Aka, anihimya t’Apwiya.” Munnona? Ti vaavo nyuwo. . .

274 Nto nyuwo munimukuxa munna mwamukhani eemenleene valoomoni, anlaka ni maitho awe ota, ni khino eemenleene

vale oopaka ekitara, iiraka, “Munna, murwe, mwaaphwanye Apwiya!”

²⁷⁵ Pastore onoovira, ni wira, “Huh! Muthukumano aka khawaarowa . . . Vano, miyo nkaarowa opatthana, nkaarowa ohiya wawaka . . . nkaarowa omuhiya Liddy ni Johnny n’akina okoona kiryeene nipuro ntoko nle.” Muroweke, osuulu wa xetwani, nyuwo munaattamela makiseryo anyu a Mahiku othene, khula enamuna. Ti yeyo. Miyo kaamuwerya ohimya nuulumu nikina vo, ni wira “aana oophwanyiwa,” nto ti vaavo ehalel’yaya okhala-vo. Maana, moone, nyuwo . . .

²⁷⁶ “Khaavo onwerya orwa wa Miyo ahikhanle Atithi Aka omuruuha. Ni othene ale anrwa wa Miyo, Miyo kinimwaahihimuxa nihiku nookiserya. Khiyavo hat’etthu enrowa orimeela. Miyo kookhalana. Miyo kinoosuka. Khavo mutthu onwerya wira ela, ehikhanle Ela.”

²⁷⁷ Othene anikhala mwa Yowo. Nyuwo khamunwerya wira, “Miyo kihira etthu emosa.” Awo mahala a Muluku yiirale sokhene iyo. Tivo, khiyaavo kiiraly’aka. Miyo nkinatoko okhalana etthu yo wira; khamunatoko, nnakhala. Nyuwo khamunaphwaneleke etthu emosa. Muluku t’irale khula etthu wa yeyo. Nyuwo khamunatoko okhuna ekatha anyu wa nipuro nimosa na yeyo. Nyuwo khamwiinre, “Ahe, miyo kinikhuma mw’emusini mooreera. Miyo kihira *ela*.” Eyo kherina nata n’iyo. Muluku ti Ole iirale; Ikharari sa Muluku.

²⁷⁸ Kileveleliwe vano, khenaphiye ewora ya namuloko ni emosa, masi kinoomaliha, khula enamuna. Munnona?

²⁷⁹ Akavi ansuwela sana wira Bibilia onnilavula itthu iya okhala Ekeekhai? Nyuwo atthu oTapernakulu Branham, vanci-enexa. Vano, eyo t’ile ri emosa muhina wa muloko ni thanu na mosa hiyo siniixuttih’ahu ni nnaamini ahu. Masi, muupuwele, nyuwo muri va, miyo kintthuna kihimye ela, nyuwo atthu muhinrwa va ntoko atthu aniira mpannta. Enamuna hiyo enaamin’ahu ila, wira *Ola* Bibilia, ni Bibilia Ekeekhaii ya Muluku.

²⁸⁰ Ni hiyo ninnaamini, wira, mwa Waataana wa Khalai, vano, awo yaahikhalana enamuna y’osuwela ele yaari ekeekhai n’ile yahaari ekeekhai.

²⁸¹ Vano, hiyo othene noosuwela wira awo yaahikhalana ikano saalempwe. Akavi ansuwela yeyo? Ikano, so—sooruma saari munivukuni, ni sikina; vaareera, nto ikano mwa sooruma. Saahimya wira, “Nyuwo muhiraruwe. Khula mutthu onraruwa onoovonyiwa ni maluku.” Munnona? Eyo yaari yo—yooruma, ni ekano mwa yooruma. Vano, nivuku naakhala ntoko so; sooruma saari muhina mme, ni ikano sa sooruma saari mukafukhuni mpararini mwa nivuku. Arwa mulopwana va, orarunwe; vaaphiy’awe va aaphwanyana ele ikano sihimaly’aya,

“mmuvonye.” Owo aamukuxiwa naanaanoru khuvonyakasiwa. Ti yeyo ikano saary'aya mwa sooruma.

²⁸² Vano awo yaahikhalana inamuna piili tho s'osuwela. Okathi wothene sinikhala tthaaru, ntoko elipiheryo. Awo yaahikhalana enamuna ekina y'osuwela, ni eyo yaari ni profeta wala namaloha. Akavi ansuwela yeyo? “Akhala mmosa eriyari anyu ori a eroho, wala profeta, Miyo Apwiya kinimwiisuweliha Mmansaka mwa yowo molohani, ni kinoolavula ni yowo mwa soowoona.” Ti yeyo. Vano, owo aari namahimya s'eprofeta.

²⁸³ Vano, akhala mutthu aarwa, khwira, “Oh, Aleluya, miyo koophwanya! Miyo kinihimya vano mwa Nsina n'Awpiya. Miyo kookhalana muupululo.” Awo khayaahiya eyo erowaka siiso, ntoko nyuwo athu siniir'anyu. Awo yaamuwehaweha ni Muluku, toko.

²⁸⁴ Vano, vakuwoni ya vatthirima ya Aroni awo yaahikhalana ele yihaniwa Urimi Tumimi. Akavi atonko wiiwa nuulumo nlo? Yaari exeni iyo? Yaari maluku muloko ni manli, mathanu na mosa khula epantte, a axitithi muloko nanli; yasperi, Yuta, n'akina, arowaka, maluku muloko ni manli. Nto vo awo yaamukuxa profeta ola, wala namaloha, nto awo yaanithomeya ekuwo ela ya vatthirima, nto awo yaanimweemexa vale. Nto awo yiira, “Vano mulavule ni muhimye oprofeta anyu.”

“Apwiya aalavula ni miyo khuhimya itthu khata—khata.”

²⁸⁵ Khivaacali moota yaakhal'aya ntoko y'ekeekhai, eyo poti wiiweya ntoko ekeekhai voomalela; masi warya iwe waahikumaneru khupaka muthinto w'ekhwei vaavale, Urimi Tumimi, warya iwe okumanaka vamosa, muteko muulupale, olipiheryaka. Moone, Muluku okathi wothene onnilipiherya Masu Awe. Munnona? Nto warya iwe wuulupale waahikaryeru vale, nto khenikicali moota yaakhal'aya ntoko y'ekeekhai, yaahivonyeya.

²⁸⁶ Namaloha ahimyaruru wira, “Miyo kooloha yooloha, nto yooloha ela yaahimya, wira, ‘Isarayeli aahaana okhuma arowe nipuro khata, 'okhala wira Asiria anrowa orwa epantte *ela* nno amukuttele.’” Awo yaamukuxa namaloha owo mpakha iwe; owo aamuhimya yooloha awe. Waarya iwe waahikaryeru vale, owo aahivonya, hata wira . . . Vakhala wira Asiria yaahilikanela ekhotto nipuro nno, owo aahivonya. Nnari, mulopwana. Awo, vekeekhai, yaahaana wooniheriwa ni Urimi Tumimi.

²⁸⁷ Vano athu othene annisuwela wira onamukuttho waahimala, waahikhwela, nto Urimi Tumimi, waaronwe ni yowo. Hiyo noosuwela eyo, khanisuwela? [Muthukumano onira, “Amen.”—Mol.]

²⁸⁸ Nto onamukuttho musya waahirwa. Exeni? Hiyo nookhalana Urimi Tumimi olelo? Ayo, mulopwana. Masu a Muluku! Ayo, mulopwana. *Ala* ti yowo. Akhala mutthu ti mutthu orina khula enamuna ya muupululo, wala onlavula etthu p'itthu, wala

mwixuttiho ohinlikana ni omu- . . . ni omutthariha Bibilia ola, muhina mwa Solempwa sothene, owo oovonya. Miyo khenikicala muromolelo xeni owo ory'awe, mota oreeraly'awe murima, mota siry'awe oosuwela, mota siry'awe oosoma; owo oovonya.

²⁸⁹ Nto akhala mutthu ti mutthu onoohimeeryani itthu iya, hiyo niixuttihaly'ahu va mukereja naanaano, ni wooleelani, wira, "Nyuwo mwamiseriwaru, ti yooreera," owo ooleenleni etthu yoowootha. Eyo khenrowa overunya va Urimi Tumimi. Owo ooleelani, wira, "Oyeeherya ti yooreera," owo ooleenleni etthu yoowootha. Owo ooleelanru wira, "Opatisiwa ni nsina na 'Atithi, Mwana, Eroho Yowarya,' ti yooreera," owo ooleenleni etthu yoowootha. Owo ooleelanru wira, "Mahiku a miirirya aamala," owo ooleenleni etthu yoowootha. Owo ooleelanru wira, "Ti yooreera athiyana olaleya," owo ooleenleni etthu yoowootha. Owo ooleelanru wira, "Ti yooreera orowa ohoolo ni opharelela muromolelo anyu," owo ooleenleni etthu yoowootha. Eyo khenrowa overunya va Urimi Tumimi. Ni itthu muloko ni piili kamosa kamosa sinikhuma, mwa "MAI NAMARARUWA," ni sinikhuma mme, nto ti vaavo hiyo nnirakamel'ahu muromolelo.

²⁹⁰ Hiyo ninnaaphenta axinn'ihu alopwana n'athiyana mmuromoleloni mme. Masi nyuwo muhiroweke, ni wira, "Miyo ka Metotista," ni wookhalihani muKristu, wa miyo. Nyuwo mwa muKristu okhala wira muyariwe ni Eroho ya Muluku. Khamurina y'okhala Metotista wala Patista. Nyuwo khamurina y'okhala hata mmosa. Nyuwo muhaana oyariwa ni Eroho ya Muluku paahi. Nyuwo munnaamini yeyo? [Muthukumano onira, "Amen."—Mol.]

²⁹¹ Vasulu va ilipiheryo iya, akhala mutthu ori va onttuna okhaliherya n'ukela muhina w'opatthana w'okokhorela nno, ni onttuna okhala—onttuna opwinihiwa, opatisiwa ni Nsina na Yesu Kristu, va yookhala etanki. Atthu anrowa opatisa, mwa minutu mmosa paahi.

²⁹² Akhala mutthu, anci-ene va, khula mutthu onttuna orwa, mwa khula enamuna? Hiyo nri va. Ti yeyo.

²⁹³ Vano, hiyo—hiyo kharina eyiirelo mpantta; nyuwo murweke paahi ekereja ela. Hiyo ninnaamini wira Kristu ori mukereja Metotista, ekereja Patista, ekereja Prespiteriyano. Owo ookhalana atthu mwa khula emosa wa seiyo. Nto etthu enihaleela, olelo; oprofeta woowootha okumiheryaka itthu iyo, mwixuttiho wa ikereja iyo, yowo ori woovirikana namukhuluwuru ni Bibilia.

²⁹⁴ Vano, aakhanle mutthu iirin'he Eyo okhala yoowooneya oratteene wa miyo, miyo vekeekhai khaamukhala mmansaka. . . . Miyo kookupali wira yookhala Eroho ya Muluku yoophiyerya mwa miyo, wira kimutholatholeke Bibilia ole n'urwa n'ulakiherya. Vaari wira kaamweetta paahi n'uvahana mukhono ni mulaleyi, n'uhela nsina naka mulivuruni, ni nlelo

khinakhalana onyokhana ni otakhala mmurimani mwaka, ni nlelo kinakhalana nrima n'ikhotto, ni nlelo ohimwaamini Yesu Kristu okhala Mpenuxa muulupale, ni sikina ntoko siiso, miyo kaamurowa kookoleliwe ni Muluku, naanaanoru. Miyo kookupali wira kaamurowa. Miyo—miyo kaamukhala naxariya mwa yeyo. Miyo kaamurowa kakhale sana ni Muluku. Vaari wira miyo kaamupharelela paahi mwaha w'okhala Patista wala Metotista, miyo kaamukhuruwa kikhallane oKristu mmurimani mwaka. Kaamwiira yeyo. Ayo, mulopwana.

295 Vano muupuwele muhakalaliho onoorwa, yowo onrowa opacerya, Apwiya yatthuna vale, Namararu enoorwa ohiyu. Ori mwa ilipiheryo seiya.

296 Nwiryane, apatthani, ookhala Muluku eekeekhai ni mukumi. Ti yeyo. Yesu Kristu ti Mwana a Muluku. Eroho Yowarya eri Mukereja olelo.

297 Vano, vaakhanle wira aahaana okhala mutthu wira akileele yeyo, miyo khaamukhalana ehakhi yo waanyiherya. Masi, nwiryane. Nihiku nno khalai, ntoko mwammiravo, miyo keemenle vathi vamwiri; miyo kaahimoona Yowo. Kaahimwiiwa Yowo. Owo aahikileela, khwira, “Mwiirakamihele athiyana ootakhala. Mwiirakamihele asikaro. Mwiirakamihele onyemula, owurya, n'itthu sothene iya. Miyo kookhalana muteko wira nyuwo muvare okathi onrow'anyu wunnuwa.” Miyo koosuwela wira Owo Muluku eekeekhai, mukumi oniwana ni Masu Awe.

298 Okathi onnuwaly'aka vakhani, moota Owo aakikumananne awe, moota Owo aalavunly'awe ni miyo! Moota miyo omoonaly'aka Owo vale, ntoko mwiiwa woovarela, ni Moro ole weetaka vale! Moota omoonaly'aka Owo olavula n'uhimya vekeekhai ele yaarowa wiiraneya; ni, khula okathi, okhala yoolikana ntoko sinweryaney'aya okhala, yoolikana siiso.

299 Mmosaru Yole onihimya itthu iya soolikana siiso, mmosaru Ole onikuupululela miyo wira kimwiixuttihe Bibilia ola ntoko sinimwiixuttih'aka Yola. Ti yeyo. Tivo, Eyo enikhuma wa Muluku. Wa miyo, ti Muluku Oowerya sothene, ni Owo mmosaru nsana, olelo, ni mahiku othene.

300 Yesu ohimye wira, “Miyo kikhumme wAtithi, ni kinrowa wAtithi.” Okathi Owo waarw'awe . . .

301 Okathi Owo waaryaawe Muluku mothakoni, Owo aari Warya waavarela. Nto akavi ansuwela yeyo? [Muthukumano onira, “Amen.”—Mol.] Owo aari Warya waavarela, Nlumi na Moro.

302 Nto Owo khurwa va elapo ya vathi, nto Owo khwira, “Miyo kikhumme wAtithi, ni kinrowa . . . Miyo kikhumme wa Muluku, ni kintthikela wa Muluku.”

303 Okathi Owo okhwiw'awe, khuvithiwa, khuhihimuwa tho, nto Paulo arowaka oTamasiku aahikumana ni Yowo tho, Owo aari

exeni? [Ookhala onira, “Nlumi na Moro.”—Mol.] Nlelo Nlumi na Moro. Ayo, mulopwana.

³⁰⁴ Exeni Owo iiraly’awe okathi wary’awe va elapo ya vathi? Exeni Owo iiraly’awe okathi Owo aakumananne awe Paulo? Owo aamuramme sai? Owo aamurumme wa profeta yowo aamuhimeenrye moota w’opatisiwa, khumuhimeerya etthu yo wira; khumwiixatherya matata awe khunvoniha, khumuhimeerya wira aahoona yowoona.

³⁰⁵ Yesu yowo mmosaru ori vaava olelo, iiraka itthu imosaru, ni nlelo Nlumi nenle na Moro, iixuttihaka etthu emosaru, ni alipiheryaka ni Masu Awe, ni miiriirya ni mitikiniho. Miyo kinnitthapa vanci-ene okhala muKristu, nkinsuwela etthu yo wira. Miyo kinnitthapa nyuwo okhala muKristu.

³⁰⁶ Nto nyuwo, etapernakulu va, miyo kihooleelani wira hiyo ninrowa orukunxa nsina naya yela. Khivareenre ela okhala Branham Tabernacle. Owo mutthu paahi, moone. Hiyo nnoorowa orukunxa nsina naya, nikhalihe nsina nikina. Hiyo nnoorowa okela mwa yeyo, okathi vakhani. Miyo kintthuna paahi wira ekhale e—ekereja ya Muluku mukumi. Miyo nkinthuna ela Metotista, Patista, Prespiteriyano, Pentekosite. Miyo . . .

³⁰⁷ Atthu ale othene, miyo kinaaphenta ni murim’aka wothene. Miyo nkinaasuwela t’ani ori pani. Nkinwerya woohimeeryani. Miyo kihaana olaleya Masu paahi. Miyo kinriha ntthavi n’upurula. Aakhala-mo anaphulu, ni aakhala-mo a rantthasi a mmaasini, ni sookhala-mo inowa, ni sookhala-mo ihopa, nave. Eyo ti ya Muluku olamula yeyo. Miyo kimpurula ntthavi paahi, olaleya Masu paahi n’upurulela-mo, ni wira, “Ala ari va, Pwiya, othene aryeene waltari. Nyuwo munaasuwela Ale Awinyu; Nyuwo mwaasuwenle awo opacerya wopattuxani. Miyo nkinsuwela t’ani okhanle pani. Nyuwo munnisuwela, vano eyo ti Yawinyu, Pwiya. Eyo ti yooreerexa miyo enwery’aka wira. Miyo kinoorowa nno omiserya ni ntthavi na mpurulo nipuro nikina vano, ni okeliha nikhuru nikina. Eyo ti yothene miyo enwery’aka wira.” Vaareera.

Oh, miyo kinoona ntoko wetta ekwaha
kirowaka,
Miyo kinoona ntoko wetta ekwaha kirowaka;
Etthoko Aka ya Wirimu ti yo waarya ni
yooreera,
Nto kinoona ntoko wetta ekwaha kirowaka.

³⁰⁸ Vano muupuwele, khula mutthu ontthuna ovaanela, amulikarele Mwenye Mercier va: BUTler 2-1519. [Nummaru na telefoni noopatiliwa.—Mol.] Hiyo nnokhala ootthapa owoonani. Ale munaaphent’anyu yarwa vale, ahaana waakuvasa okathi wa muhakalaliho. . . Vano miyo kinrowa, opacerya ohiy’ula, orowa mmansaka, ni okhuma mahiku manli vano, mmansaka.

309 Miyo kinookela mme paahi n'urowa osoma, ntoko sa, "Pwiya, Nyuwo muri vakhiviru ni miyo. Miyo koosuwela wira Nyuwo muri vaava. Ni Masu Anyu ahimnye wira Nyuwo mwaanwaattamela ale aniwaattamelani Nyuwo." Miyo kinikhala kivekelaka ni kiwehaka mpakha koone Nlumi na Moro opacerya wetta. Miyo kinoosuwela wira yoolikana nto. Nto miyo kinimweetta vaplataforma wa muteko w'ovoniha va, wira kivekele, ni wira ele eniwery'aka wira kaakhaliherya aretta n'ale ooriipiwa murima.

310 Hiyo ninnisiveliwa n'ureerra wanyu murima wothene vano. Nto nyuwo mwaarw'aka, murweeke mwaaminiki, ni hiyo ninwehererya okhalana muthukumano muulupale. Miyo kintthuna ohimya wira . . .

311 Munna Jeffries, ori vaava ohiy'ula? Hiyo nintthuna nimuxukhuru Munna Jeffries ni muteko awe. Miyo kinoona wira owo ootthikela musisironi, ni sikina.

312 Kinnitthapa omoona Munna ni Murokora Wright, ni anciene a nyuwo atthu va.

313 Ni koomoona mulapeleli Robertson va, okathi ovinre, ovolonwe okathi ovinre. Miyo kaatthuna omuttotopela yowo mwaha wa—mwaha wa mutthaka awe owo aalaleenry'awe nihiku nle. Khaavo aahimnye wira aari pani. Eyo yaari ehaaya. Owo aarina mutthaka wooreerexa mwa oprofeta, etthu ntoko ele kilalenry'aka ohiy'ula.

314 Nto, vano, aakhala murumeyi mukina va vaasiis'ula, ahiso nsana ohiyu, Munna Smith, a ekereja Metotista . . . wala a Ekereja ya Muluku, nno. Nkisuwenle sinto owo ori vaava ohiy'ula, wala nri. Nyuwo mweemelaruvapulpitu va n'uweha ottuli epantte ile, enikhala yoolipa ohimya; ti yooxankiha, moone, nto khivanweryaneya ohimya. Mwaari vaava, Munna Smith, hiyo ninnooxukhuruni.

315 Nto ola kahiyo, okilanthi va, munna ola mwaamukhani a oGeorgia, ottuli nno okilanthi vakhiviru ni Munna Collins? [Munna Neville onira, "Ayo."—Mol.] Kinnitthapa owoonani vaava tho ohiy'ula, munna.

316 Nto akina a nyuwo, othene anyu, khula mmosa oosuwela nyuwo mw'ani.

317 Miyo kinoona wira ola ti murokora ni munna va yaaronwe onvekelela mwaaruusi okathi ule, va, tothoro okilanthi va epantte ele. Apwiya yooreeriheni, tothoro.

318 Vano, xontte muhiisoone ooveehiwa ni miyo, nyuwo arumeyi n'axinna, mwaha wa enamuna oneettih'aka ela vootthuneyaxa mwa vekeekhai voolipaxa ntoko sinwery'aka. Ela etapernakulu ahu. Ela t'ile eneemerery'ahu, ni hiyo nintthuna nikhalihe Ela vasulu va Masu vaavo, ni waattikinya ni Yawo. Nto, nyuwo mwakhalakhala mukhumaka mphironi, hiyo nnootthika ni

wira, “Nyuwo mwaanisuwela oratta-ene. Ela eri va mufiitani.” Munnona? Eyo eri vo. “Ela eri va mufiitani.”

³¹⁹ Hiyo nookhalana tho oowaatta yaarowa orwa iwo, Leo. Masi, masi hiyo. . . Nyuwo mookhalana eyo yinci-ene. Nyuwo mukhale oratta-ene ni Yeyo, nto hiyo nnookhalana ekina ya Yeyo okathi vakhani. Ntoko mulopwana aari, aalya niwuryo, khwira, “Nlo naari noosiva vekeekhai, masi nookhala tho nikina.” Tivo hiyo nookhala tho yoowaatta Yeyo, nlelo, enoorwa.

³²⁰ Apwiya yooreeriheni, vooreerexa vano. Okathi hiyo. . . Onrow’ahu okhalana muteko w’opatiiso naanaano va. Ti yeyo, Munna Neville? [Munna Neville onira, “Ayo, kookupali.”—Mol.] Ookhala mutthu va wira apatisiwe naanaano va? Hata wira nyuwo mw’ani; hiyo nri—hiyo nri va wira nipatise. Muvenxe matata anyu, ale yaari wira apatisiwe. Mutthu mmosa, kookupali wira aari mu. . . Va ookhala muthiyana va. Nto aahikhala mukina tho? Vano, hiyo nookhalana ikuwo va s’alopwana n’athiyana.

³²¹ Vano, hiyo khanniira, “Mukhume ekereja Patista. Mukhume ekereja Metotista.” Hiyo khanniira. Nyuwo mutthikeleke okereja wanyu. Masi mwiira muhipatisiwe ntoko Yolempwa, ni Nsina na Apwiya Yesu. . . Kahi ni Nsina na “Yesu” paahi, vano. Ni Nsina na “Apwiya Yesu Kristu,” eyo t’eri Yolempwa. Nyuwo mupatisiwe voovonyeya.

³²² Miyo nkinthuna hata mulattu okathi ontthun’aka ophiya omuratthini. Miyo kintthuna itthu sothene soowooneya ntoko sinsuwel’aka moota, okathi onvarel’aka ettikitti ile, moone, ’okhala wira miyo kintthuna kiwele okathi uwo. Miyo kaatthuna woolopolani wira yeyo.

³²³ Mutthikele okereja wanyu. Eyo ti, yawinyu nyuwo ni Muluku. Eyo ti yothene enwery’aka wooleelani.

³²⁴ Masi khaavo mwa Solempwa otonko opatisiwa enamuna ekina woohikhala Nsina na “Apwiya Yesu Kristu.” Nto ale yaapatisiwe, yaahirummwa ni Paulo Owarya, yowo iirale, “Nakhala Nlaikha naarowa olaleya etthu ekina, atakhaliwe.” Aahaaruma awo orwa opatisiwa, emara ekina, ni Nsina na “Apwiya Yesu Kristu.” Ti yeyo. Ni owo aahiira. Nto etthu iiraly’awe, owo onirumme hiyo wira; ti yeyo hiyo enrow’ahu wira, Muluku atthuna vale.

Hiyo ninnaamini orapiha wa inawo. Hiyo ninnaamini waataana.

³²⁵ Hiyo ninnaamini Orwa wa neenli wa Kristu, soowooneya, erutthu y’Apwiya; kahi Eroho, masi erutthu y’Awpiya Yesu erw’aka tho movuwani.

³²⁶ Hiyo ninnaamini ohihimuwa w’erutthu y’alipa-okhwa, wira yaakhele erutthu, kahi yowuuluvala ni ya manyari ntoko

sinrow'ahu omahiye; masi esya, motthapani w'emiravo, wira nikhaleke mahiku othene.

³²⁷ Hiyo ninnaamini ohikhwa wa munepa, vekeekhai. Hiyo ninnaamini wira eri enamuna emosa paahi y'Ekumi Ehinimala, nto eyo Ekumi nyuwo munaakhel'anyu wa Kristu Yesu. Eyo vekeekhai ekhweeli.

³²⁸ Tivo, hiyo khinnaamini ohukhummwa Ohinimala. Hiyo ninaamini okhwa w'omooroni, ovarela wa maluku a moro, masi hiyo khinnaamini wira onivarela mahiku othene; wiira siiso, nyuwo munikhalana Ekumi Ehinimala. Eri enamuna emosa paahi y'Ekumi Ehinimala; Eyo enikhuma wa Muluku. Ni ti yeyo. Nyuwo munrowa opahiwa, khino iyakha imilyau sene, iyakha imilyau muloko, nkisuwenle, masi khivanweryaneya okhalana Ekumi Ehinimala. Khivanweryaneya opahiwa mahiku othene. . . Nyuwo pooti opahiwa mahiku othene, masi kahi Woohimala. Moone, wookhala ovirikana Ehinimala ni mahiku othene. *Mahiku othene* enikhala mahiku othene ni mahiku othene, elupanyelo, enihimya "evirelo y'okathi." Masi, Ehinimala, khekhanle ehukumu Ehinimala.

³²⁹ Nyuwo munikhalana Ekumi Ehinimala, 'okhala wira eri enamuna emosa paahi y'Ekumi Ehinimala. Nto ole orina Ekumi Ehinimala, mukumii ni t'oreerihwa ni Muluku mahiku othene.

³³⁰ "Masi munepa ontheka, munepa yowo onoo. . ." Exeni? [Muthukumano onira, ". . . onookhwa."—Mol.] Ti yeyo. Nto, owo khorina Ekumi Ehinimala. Vekeekhai. Owo orina—owo orina ehukumu aya, masi kahi Ekumi Ehinimala.

³³¹ Vano, nyuwo moone, sookhala itthu sinci-ene nlelo sintthuneya wira siixuttihiwe, hiyo nnoophiyerya ohoolo. Apwiya yooreeriheni.

³³² Vano nrowe niipe esipo ela yooreera ya khalai, okathi murokor'ihu onrow'awe mme. Miyo kookupali wira muhano ola va poti. . .

³³³ Rosella, ale t'amey'anyu? [Munna Rosella onira, "Ayo."—Mol.] Vano, oreerihwe murima anyu! Koothapela owoonani, munna, mwiiraka yeyo. Eyo ti yooreerexa.

³³⁴ Rosella Griffin, mmosa wa axipatthani ooreera murima hiyo orin'ahu. Owo mwamuthiyana aari namuhapaliwa; wa athu kamosa kamosa nyuwo va, poti ohimusuwela. Rosella muhicali mwaha wa miyo ohimya eyo. Okathi owo orwiy'awe vaplataforma iwe o—o weiwo. . . oIndiana nno. Nyuwo mootoko omoona namutakhaliwa, owo aari mmosa a yawo, namuhapaliwa a maitho ootweelela. Vaavo, matothoro axexe a oChicago yaahimaly'aya wira owo ti. . . Anamuhapaliwa Oohisuweliwa, ni itthu sothene sikina, yaamuwonke aya. Masi ohiyu omosa okathi owo waaruly'awe vamuthukumanoni, Eroho Yowarya khuuhula makhalelo awe khumuleela vaavale vene. Eyo khumaliha mwaha.

³³⁵ Nkanweheni vano, miyo kookupali, iyakha miloko miraru n'itthu, aamurowa okhala a muloko ni thanu na tthaaru; mwamuthiyana oophenteya, ooreera. Khanalawiheke whiskhy okhuma vaavo; khantthuna tho. Onikhala mwaha wa Kristu, arowaka mphironi, mapuro othene, ahimeeryaka onamoona wa ovuwa wa Muluku, anatampi ni anamuhapaliwa, mmuttettheni mothene w'alipa oohikhalana opuro, ni itthu sothene sikina, oChicago, iiraka etthu mwaha w'Apwiya.

³³⁶ Owo oopatisiwa ni Nsina n'Awpiya Yesu, ni amey'awe anoorwa ohiy'ula wira yiire siiso; vaari wira Muluku aammuvoniha, vaari wira Yesu aammuvoniha... "Sothene eniir'anyu ni nuulumo wala ni miteko, mwiireke sothene mu Nsina na..." [Muthukumano onira, "Yesu Kristu."—Mol.] Ti yeyo Bibilia ohimaly'awe. Ti yeyo.

³³⁷ Vaareera, vano ninrowa okhalana muteko w'opatiiso. Ninrowa ottipiha maluuxu minutu vakhani paahi okathi onrow'ahu wiilikanyihya wira nivare muteko, mupatisiwe, ni—ni nnoorowa owehererya okathi wooreerexa mw'Apwiya.

³³⁸ Munoorowa ovara muteko w'opatiiso ohiy'ula? Vaareera, vanreerela—vanreerela mwiilikanyihe. Nto miyo kinoopacerya, kinooholela isipo n'itthu sikina okathi onrow'ahu ohoolo nto. Okathi awo anikhalih'aya... [Munna Neville onira, "Sookhala ikuwo sinci-ene ottuli nno, Doc?"—Mol.] Ikuwo s'opatiiso, Doc, mwaakuveke. Vaareera.

³³⁹ Nrowe niipe emosa wa isipo iye sooreera sa khalai... [Munna Branham onihoolela muthukumano wiipa, Munna Neville omupatisaka munna owo—Mol.]

³⁴⁰ [Nipuro vahiitthu mufitani—Mol.] Nto mpakha hiyo wira eyo, okathi onikhum'ahu, nihaana wira exeni?

Nikuxe Nsina na Yesu ni hiyo,
Nikokhoraka munawoni Mwawe,
Mwene a mamwene Wirimu, hiyo
nnoomuwaraha nleha Yowo,
Okathi ekwaha ahu eniphiy'aya okhomoni.

Vaareera, nivenye!

Mukuxe Nsina na Yesu ni nyuwo,
Anamwane a mixankiho ni ooripiwa murima;
Nlo nnimoovahani opuha ni otteeliwa
murima...

³⁴¹ Miyo kinimooleelani etthu enrow'ahu wira. Murukunuwe ni muvahane mukhono ni mutthu vo, mwiire, "Ehali anyu, munna? Miyo vekeekhai kootthapa okhala vamutekoni w'okokhorela ni nyuwo."

Nsina nooreerexa, Oh moota ninsivel'aya!
...ni otthapa wa Wirimu;
Nsina nooreerexa, Nsina nooreerexa, O...



EPYO Y'ENOWA EMK58-0928E
(The Serpent's Seed)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yettaka 28 mweri wa Setembro, 1958, oBranham Tabernacle, oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org